

Inatsisissatut siunnersuummut oqaaseqaatit

Oqaaseqaatit nalinginnaasut

1. AALLAQQAASIUT

Kalaallit Nunaanni aningaasaliisarnerup siuarsarneqarnissaa Naalakkersuisut kissaatigaat, kisianni nunanit allanit aningaasaliinerit pisut ilaanni Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerat tamatuma peqatigisaanik nalunagu.

Kalaallit Nunaata isumannaatsuunissaanut imaluunniit tamat toqqissisimatinneqarnissaannut nunanit allanit aningaasaliinerit navianartorsiortitsisinnaanerisa pitsaaliorneqarnissaat, siunnersuutip matuma siunertaraa. Misissuinermik aaqqissuussinerup, aningaasaliinernut Kalaallit Nunaata isumannaatsuunissaanut imaluunniit tamat toqqissisimatinneqarnissaannut tunngatillugu suliassa qarfinni malussarinnerpaatut nalilerneqartuni, suliassa qarfiit assigiinngitsut akornanni nammineq kajungissutsimik nalunaaruteqartarnermik ataqatigiissitsisumik ilusilerlugu, suliassa qarfimmik tunngaveqartumik akuersissuteqartarnermik aaqqissuussinerup eqqunneqarnissaa, siunnersuutikkut siunnersuutigineqarpoq. Aningaasaliinerit immikkut ittumik piumasaqaatitalit akuerineqarnissaat, imaluunniit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartut, inerteqqutigineqarluinnarnissaat, misissuisarnermik aaqqissuussinerup periarfississavaa.

Kalaallit Nunaanni inuiaqatigiit ineriartornerat aamma aningaasaqarnerup allanngorartinneqarnissaanik politikkikkut annertunerusumik ukkatarinninneq ilutigalugu, taamatuttaaq nunarsuarmi tamarmi niueqatiginninnermik annertunerusumik pisariaqartitsineq saqqummerpoq. Tamatuma peqatigisaanik nunarsuarmiunngorsaanerup annertusiartortup unammilligassanik isumagineqartariaqartunik nutaanik unammilligassaqaalernera kinguneraa, aamma taamaalilluni tamanna periaatsini aaqqiissutissanik amerlanerusunik peqarnissamik piumasaqaateqalersitsivoq. Nunanit allanit sullissisunit Kalaallit Nunaanni aningaasaliinissamut pigisaqalernissamullu suli soqutiginnittoqarnissaa naatsorsuutigineqarmat, Kalaallit Nunaanni suliffeqarfinni immikkoortortanilu allani aamma suliniutini, pisut ilaanni nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasut, Naalakkersuisut nalilerpaat.

Nunani amerlasuuni misissuineq ullumikkut atorneqartarpoq aamma nunanit allanit aningaasaliinernut pissarsinernullu, assersuutigalugu Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasutut nalilerneqartunut akuliunnissamut, sakkutut annertusiartortumik ajorneqartarluni. Tamatuma peqatigisaanik nunarsuarmi niueqatigiinneq suleqatigiinnerlu annertunerusoq Kalaallit Nunaanni suli kissaatigineqarpoq. Misissuisarnermik aqqissuussinerup atortuulersinneqarneratigut, iliuutsit akuliuffiusut aamma aningaasaliinermi avatangiisit peqqissut akornanni oqimaaqatigiinnerup eqqortup nassaarinissaa taamaalilluni pingaaruteqarpoq.

Nunanit allanit aningaasaliinerit aamma pissarsinerit il.il. pillugit misissuinissamik aqqissuussineq pillugu nalunaarusiap [XX] 2025-immersup ilaatigut siunnersuutip malitseqartitsissutigaa (Naalakkersuisoqarfiit assigiinngitsut akornanni suleqatigiissitanit naliliinerit innersuussinerillu). Nunanit allanit aningaasaliinerit ilaasa misissorneqarnissaat pillugu suliassat allassimaffiat Naalakkersuisunit akuersissutigineqarnera aamma Kalaallit Nunaanni misissuinissamik aqqissuussinerup pilersinneqarnissaa siunertaralugu, naalakkersuisoqarfiit assigiinngitsut akornanni suleqatigiissitat pilersinneqarnerat, nalunaarusiami tunngavigineqarpoq.

2. Siunnersuummi immikkoortut pingaarnerit

2.1 Siunertaq, atuuffissaa aamma nassuiaatit

Kalaallit Nunaata isumannaatsuunissaata aamma tamat toqqissisimatinneqarnissaasa eqqarsaatigineqarnerat aallaavigalugit aamma pisariaqartinneqarpat akuliussinnaaneq pillugit, Kalaallit Nunaanni nunanit allanit aningaasaliinerit misissorneqarnissaannut periarfissiisumik, ullumikkut inatsisitigut tunngavimmik nalinginnaasumik peqanngilaq. Suliassaqarfimmut immikkut ittumik inatsisiliornermik, eqqarsaatigisassat assingi aallaavigalugit nunanit allanit aningaasaliinernik misissuinissamut periarfissiisunik, aammattaaq pigineqanngilaq.

Nunanit allanit aningaasaliinernut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartunut, Naalakkersuisut akuliunnissaannut periarfissaliissutip pilersinneqarnissaa, siunnersuutip siunertaraa. Tamanna ilaatigut suliassaqarfimmut immikkut ittumik misissuinissamut aqqissuussinertut ilusilerlugu, § 4-itut siunnersuutigineqartoq malillugu aningaasaliinerit immikkut ittumik malussajasutut nalilerneqartut pillugit, aamma aningaasaliinernut allanut tunngassuteqartumik § 5-itut siunnersuutigineqartoq malillugu suliassaqarfiit assigiinngitsut akornanni misissuinissamik aqqissuussinikkut, tamanna atortuulersinneqassaaq. Suliassaqarfiit, Kalallit Nunaanni Namminersorneq pillugu inatsit nr. 473, 12. juni 2009-imeersoq malillugu Kalaallit Nunaanni

Namminersorlutik Oqartussanit tiguneqarsimasuniippata, nunamit allamit aningaasaliinermut Inatsisartut inatsisaat atuutissaaq.

Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsinerusinnaasut qulaajarniarlugit, misissuinermi nunamit allamit aningaasaliineq Naalakkersuisut erseqqinnerusumik misissuiffigissavaat.

§ 1, imm. 2-tut siunnersuutigineqarteq malillugu, Kalaallit Nunaata isumannaatsuunissaa imaluunniit tamat toqqissisimatinneqarnissaat eqqarsaatigalugit inatsisiliornermi allami misissuinissaq aamma akuliuttoqassappat akuliunnissaq pillugit malittarisassat aalajangersarneqarsimappata, siunnersuut atuutissanngilaq.

§ 2-tut siunnersuutigineqarteq siunnersuutip atuuffissaata malippaa, nunanit allanit aningaasaliinernut naammassineqartussatut eqqarsaatigineqartunut tamanut imaluunniit aningaasaliisartunit nunanit allaneersunit naammassineqartunut, siunnersuutip atuunnissaa siunnersuutigineqarluni.

Siunnersuut atituumik atuuffissaqarteq, § 3-tut siunnersuutigineqartup malitsigaa. “Aningaasaliisarteq nunanit allaneersaq” ima paasineqassaaq, inuk, qallunaatut naalagaaffimmi innuttaasutut pisinnaatitaanngitsoq, imaluunniit qallunaatut naalagaaffimmi innuttaasoq, kisianni manna ukiut 5 sioqqullugit aalajangersimasumik Kalaallit Nunaanni najugaqarsimanngitsoq, aamma Kalaallit Nunaanni tamakkiisumik akileraartussaasimanngitsoq aamma manna sioqqullugu ukiut ilivitsut 5 Kalaallit Nunaanni tamakkiisumik akileraartussaataasimasooq, imaluunniit inatsisitigut pisinnaatitaasoq pisussaataasorlu, Kalaallit Nunaanni najugaqanngitsoq, kiisalu nunani oqartussaasut naalagaaffimmilu sullissiviit nunanit allaneersut. Matumuuna nunani oqartussaasut naalagaaffiullu sullissivii aamma Danmarkimeersutut aamma Savalimmiuneersutut paasineqassapput.

“Nunamit allamit aningaasaliineq”-rup nassuiarneqarnera assigisaanik atituujuvoq, aamma immikkoortortaarfimmi Kalaallit Nunaanni angerlarsimaffeqartumi piginnittutut piginneqataassutinik imaluunniit taasisinnaatitaanernik minnerpaamik 25 pct.-iusunik toqqaannartumik imaluunniit toqqaannanngitsumik pigisaqarnermik imaluunniit pissaaneqarfeqarnermik angusineq, immikkoortortaarfimmi Kalaallit Nunaanni najugaqartumi piginnittutut piginneqataassutsip annertussusaanik qaffaaneq imaluunniit taasisinnaatitaanernik toqqaannartumik imaluunniit toqqaannanngitsumik minnerpaamik pingajorarterutitut, 50 pct.-inut, pingajorarterutitut marlunnut imaluunniit 100 pct.-imut qaffaaneq, imaluunniit immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni

angerlarsimaffeqartup suliassa qarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarneq ilaatinneqarput. Aammattaaq Kalaallit Nunaanni suliniutit allat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasut tiguneqarnerat imaluunniit aallartinneqarnerat ilaatinneqarpoq. Inatsisartut inatsisaat malillugu akuliussinnaanermut periarfissat taamaallaat suliffeqarfimmi aningaasaliinernut piviusunut eqquinginnissaasa qulakkeerneqarnissaat siunertaavoq, tassami allaanerusunik suliniutitigut amerlasuutigut, Kalaallit Nunaanni suliffeqarfimmi piginnittutut piginneqataassutinik pissarsineq apeqqutaatinnagu, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsineq pisinnaammat.

Nalinginnaasumik nunanit allanit niueqateqarneq imaluunniit nalinginnaasumik nunanit allamiut Kalaallit Nunaanni pigisanik tigussaasunik pissarsisinnaanerat, kisianni siunnersuummi ilaatinneqanngillat.

2.2 Suliassa qarfimmi aamma suliassa qarfiit assigiinngitsut akornanni misissuinissamik aaqqissuussineq

Suliassa qarfimmi immikkut ittumi aamma suliassa qarfiit assigiinngitsut akornanni misissuinissamik aaqqissuussineq ataqatigiissoq siunnersuutip eqquppaa.

Suliassa qarfimmi immikkut ittumi misissuinissamik aaqqissuussineq inatsisissatut siunnersuummi § 4-p malitsigaa. Aningaasaliisoq nunamit allameersoq, suliassa qarfiit suliniutillu immikkut ittumik malissarissut iluanni, imm. 2-mi ilaatinneqartuni, nunamit allamit aningaasaliinissamik siunertaqartoq, tamanna sioqqullugu aningaasaliinissamut akuersissuteqarnissaq pillugu Naalakkersuisunut qinnuteqassasoq, tassani takuneqarsinnaavoq. Taamaalilluni aningaasaliisup nunami allameersup siuningaani akuersissuteqarnissaq pillugu qinnuteqarnissamik pisussaaffeqarnera aamma angusinissaa, aalajangersakkap kinguneraa.

Suliassa qarfiit suliniutillu immikkut ittumik malissarissut § 4, imm. 2-mi aalajangersarneqarnissaat siunnersuutigineqarpoq, aamma suliffeqarfiit illersornissamik suliassa qarfimmi, suliffeqarfiit it-kkut isumannaatsuunissamut atuuffeqartut imaluunniit paasissutissat isertuussat sularineqarnerannut suliffeqarfiusut, suliffeqarfiit marloqiusamik atorneqarsinnaasunik nioqqutissiortut (dual-use) aamma suliffeqarfiit teknikkikkut atortorissaarutit pingaaruteqartut allat pillugit suliffeqarfiusut ilaatinneqassasut siunnersuutigineqarpoq. Tamatuma saniatigut attaveqaasersuutit pingaaruteqartut,

Imerk nukissiorfiit, aatsitassanut suliassaqarfik aamma ingerlatseqatigiiffiit Namminersorlutik Oqartussanit pigineqartut ilaatinneqartut.

Suliassaqarfiit suliniutillu killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaapput.

Suliassaqarfiit assigiinngitsut akornanni misissuinissamik aqqissuussineq siunnersuummi § 5-ip malitsigaa. Aningaasaliisoq nunami allamioq aningaasaliineq, suliassaqarfimmi suliniummilu immikkut ittumik malissarissusilittut § 4-itut siunnersuutigineqartumi allattorneqartuni ilaatinneqanngitsaq, eqqarsaatigineqartoq imaluunniit naammassineqartoq pillugu Naalakkersuisunut nalunaaruteqarsinnaanera, taassuma malitsigaa.

Suliassaqarfiit assigiinngitsut akornanni misissuinissamik aqqissuussinermut killiliussat aalajangersagassatut siunnersuutigineqartup aalajangersarpai, tamatumalu kingorna aningaasaliisartoq nunami allamioq, Naalakkersuisunit akuersissuteqarnissaq siunertaralugu, nunamit allamit aningaasaliineq pillugu nammineq kajumissutsini malillugu nalunaarutiginnissinnaavoq.

Nalunaaruteqarnissap suliarineqarnera nammineq kajumissuseq malillugu suliarineqassaaq, aamma nalunaaruteqarneq nunamit allamit aningaasaliinermut eqqarsaatigineqartumut aamma nunamit allamit aningaasaliinernut naammassineqareersunut tunngassuteqarsinnaavoq. Nalunaaruteqarnikkut aningaasaliisoq – aamma nunanit allanit aningaasaliinerni naammassineqareersuni – oqartussaasut aningaasaliinermik akuersissuteqarsinnaanerannut aamma taamaalilluni tulliusumik Kalaallit Nunaata isumannaatsuunissaanut imaluunniit tamat toqqissisimatinneqarnissaanut eqqarsaatigisassat aallaavigalugit aningaasaliinermut akuliutinnginnissaannik pisariaqartinneqartumik qularnaveeqqummik angusaqarsinnaassaaq. Taamaalilluni § 6-itut siunnersuutigineqartumut siunnersuut atatillugu isiginiarneqassaaq, tassani nunanit allanit aningaasaliinerit, akuerineqartussat nalunaarutigineqarsimanngitsut, aningaasaliinerup naammassineqarnerata kingorna ukiut 5 tikillugit misissorneqarnissaannut Naalakkersuisut periarfissaqarnissaat siunnersuutigineqarluni.

Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat § 5-itut siunnersuutigineqartup kingunerinnigilaa. Aningaasaliisup nunami allameersup, aningaasaliinerup imaluunniit suliniutip Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu nalornissuteqartup, akuersissuteqarnissaq pillugu noqqaassuteqarnikkut erseqqissumik paasisaqarsinnaanera, § 5-itut siunnersuutigineqartumi nammineq kajumissuseq malillugu misissuisoqarnissaanik periarfissap aamma § 6-itut siunnersuutigineqartumi nunanit allanit

anigaasaliinerit nammineq kajumissuseq malillugu nalunaarutigineqanngitsut misissornissaannut Naalakkersuisut periarfissaqarnissaat siunertarineqarpoq. Tamatuma peqatigisaanik immikkut ittumik suliaasaqarfiit suliniutillu malissarissut avataanni nunanit allanit anigaasaliinernut akuliussinnaanermut periarfissaq § 6-itut siunnersuutigineqartup tunniutissavaa.

2.3 Oqartussaasoq piginnaassuseqartoq aamma aalajangiinerit

Inatsit manna malillugu Naalakkersuisut tassaapput oqartussaasut piginnaassuseqartut. Inatsit malillugu Naalakkersuisut tassaasut aalajangigassanik aalajangiisussaasut, taamaalilluni inatsimmi tamarmi aalajangersarneqarpoq. Taamaalilluni suliaasaqarfiit sammisallu immikkut malussarissusillit avataanni nunanit allanit anigaasaliinerit nakkutigineqarnissaasa misissorneqarnissaasalu annertussusissaat, Naalakkersuisut aalajangissavaat. Kalaallit Nunaata isumannaatsuunissaanut imaluunniit tamat toqqissisimatinneqarnissaannut nunamit allamit anigaasaliineq navianartorsiortitsisinnaanersoq, tamanna piumasaqaatitigut qanoq ililluni aaqqinneqarsinnaanersoq, aamma nunamit allamit anigaasaliinerup atorunnaarsitsinneqarnissaa pillugu naalakkiutip unioqqutinneqarnerani qanoq ililluni iliuusereriikkanut kinguneqartitsisoqarsinnaanersoq pillugit, Naalakkersuisut tassaapput aamma naliliisussat. Nunat allat oqartussaasuisa ilanngunneqarnissaat pillugit qaqugukkut naleqquttuussanersoq Naalakkersuisut nalilissavaat, matumani Politiit Immikkut Paasiniaasartui (PET) aamma Illersornissaqarfiup Immikkut Paasiniaasartui (FE) ilanngullugit.

Qaqugukkulluunniit naalakkersuisoqarfik inuussutissarsiornermut akisussaasuusoq oqartussaasutut piginnaasaqartutut atuuffik isumagissagaa naatsorsuutigineqarpoq, soorlu aamma naalakkersuisoqarfiup ataani aqutsisoqarfirmik, Inatsisartut inatsisaat manna malillugu suliaasanik isumagininnissinnaasussamik, pilersitsisoqarsinnaanera naatsorsuutigineqartoq.

Nunamit allamit anigaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanngippat, nunamit allamit anigaasaliinerup § 4-imi imaluunniit § 5-imi ilaatinneqartup akuersissutigineqarnissaa imaluunniit akuerineqarnissaa pillugu Naalakkersuisut aalajangiissasut, § 8-mi siunnersuutigineqarpoq. Tamatuma saniatigut anigaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, aamma § 9 malillugu piumasaqaatitigut tamatuma pakkersimaneqarsinnaanera periarfissaasimanngippat, nunamit allamit anigaasaliinerup §§ 4-miit 5 ilanngullugu ilaatinneqartup naammassineqarnissaanut Naalakkersuisunit itigartitsissuteqarnissaat imaluunniit inerteqquteqarnissaat, tamatuma saniatigut siunnersuutigineqarpoq. Siunnersuummi § 8, imm. 2-miit 3 ilanngullugu aalajangersakkat malillugit Naalakkersuisut aamma utaqqiisaagallartumik aalajangiinernik aalajangiisinnaapput.

Nunanit allanit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiutaasinnaanerata naliliiffigineqarnerani, pissutsit attuumassuteqartut aamma paasissutissat pissarsiarineqarsinnaasut tamarmik eqqarsaatigineqassapput. Tamanna pillugu § 8 tassungalu oqaaseqaatit innersuussutigineqarput.

Suliamik suliarinninnerminnut atatillugu, nunanit allanit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanersoq nalilerniarlugu, aningaasaliisumit nunamit allameersumit paasissutissat pisariaqartinneqartut tamaasa Naalakkersuisut piumasaqaatigisinnaavaat, soorlu aamma § 12, imm. 1-itut siunnersuutigineqartoq malillugu paasissutissat eqqortuunerat pillugit kukkunersiuisumit, Kukkunersiuisut aamma kukkunersiuinermik suliffeqarfiit akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, aamma aningaasaliisumit nunamit allameersumit attuumassuteqannginnerminik uppersaasumik, nalunaarummik nalunaarusiaq ilaqartinneqassasoq, Naalakkersuisut piumasaqaatigisinnaagaat.

Naliliinermi paasissutissat allat Naalakkersuisut aamma ilaatissinnaavaat, matumani assersuutigalugu paasissutissat, Naalakkersuisut suliamik suliarinninnerminnut atatillugu Kalaallit Nunaanni oqartussaasunit nunallu allat oqartussaasuinit tigusimasaat, aamma paasissutissat tusarfinnit ammasunit pissarsiarineqartut ilanngullugit.

Nunanit allanit aningaasaliinermut akuersissuteqarnissaq pillugu qinnuteqaammik imaluunniit nunanit allanit aningaasaliinerup akuerineqarnissaanut nalunaarummik misissuinerup kingorna, Naalakkersuisut Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasunik nassarpata, kisianni taakku piumasaqaatit, aningaasaliinerup naammassineqarnissaannut erseqqinnerusunik piumasaqaateqarnikkut pitsaalineqarsinnaanersut nalilerneqassaaq. Aningaasaliisartup nunamit allamiup pisussaaffittut tigussallugit neqeroorutigisai, Naalakkersuisut akuerisinnaaneraat, § 9, imm. 1-imut siunnersuut tunngassuteqarpoq. § 9, imm. 2-tut siunnersuutigineqartoq malillugu nunamit allamit aningaasaliinerup akuersissuteqarfiginissaanut imaluunniit akuerinissaanut piumasaqaatinik illuinnaasiorlutik aalajangersaasinnaanermut Naalakkersuisut aalajangersaasinnaanissaat aamma siunnersuutigineqarpoq.

Ilaatigut aningaasaliisoq nunanit allaneersoq piumasaqaatinik isumaqatigiissutigineqartunik eqqortitsinnigippat imaluunniit piumasaqaatit eqqortinneqarnerat pillugu ukiumoortumik nalunaarusiamik nassiussinngippat, nunanit allanit aningaasaliineq pillugu akuersissuteqarneq imaluunniit akuersineq pillugu aalajangiinerup allanngortinneqarnissaanut imaluunniit utertinneqarnissaanut Naalakkersuisut periarfissaqassasut, § 10-mi siunnersuutigineqarpoq. Pisuni,

taakkunani aalajangiinerup allanngortinneqarsinnaanera imaluunniit utertinneqarsinnaanera pillugu aalajangersagaq taamaallit assersuutiniq imaqarpoq.

Aningaasaliinermut akuersissuteqarneq imaluunniit akuersineq pillugu aalajangiineq utertinneqarsimappat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, imaluunniit nunamit allamit aningaasaliineq itigartitsinermut imaluunniit inerteqquteqarnermut akerliusumik naammassineqarsimappat, § 11, imm. 1-itut siunnersuutigineqartukut nunanit allanit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaanermik periarfissaqarput. Aningaasaliisoq nunanit allaneersoq inatsisissatut siunnersuummi § 4-mut akerliusumik akuersissuteqarnissaq pillugu qinnuteqarsimanngippat, aamma aningaasaliineq § 11, imm. 2-tut siunnersuutigineqartoq malillugu Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, taamatuttaaq tamanna atuuppoq. Pisuni, taakkunani § 6-itut siunnersuutigineqartoq malillugu Naalakkersuisut nammineerlutik misissuineramik aallartitsineranni, Naalakkersuisut naalakkiutiniq taamaattunik naalakkiuteqarsinnaasut, naggataagut siunnersuutigineqarpoq.

2.4 Allaffissornermut aalajangersakkat

Qinnuteqarnernut aamma nalunaaruteqarnernut, matumani § 7-itut siunnersuutigineqartoq malillugu qinnuteqaatit digitaliusumik nassiunneqarnissaat ilanngullugu, ingerlatseriaatsit pillugit Naalakkersuisut erseqqinnersunik malittarisassanik aalajangersaasinnaasut siunnersuutigineqarpoq. Taamaalilluni suliamik suliarinninnertik nammineerlutik Naalakkersuisut aalajangersassagaat aamma qinnuteqaatit il.il. suliarineqarnissaannut piffissaliussanik piffissaliisinnaasut, tamatuma kinguneraa.

Akuersissuteqarnissaq pillugu qinnuteqaatit, nalunaarutiginninnerit, piumasaqaatit pillugit neriorsuinerit, nalunaarusiat il.il., Naalakkersuisunut nassiunneqartut, kalaallisut imaluunniit tuluttut oqaasertaliorneqassasut, § 17-itut siunnersuutigineqartup malitsigaa. Qinnuteqaat il.il. tuluttut nassiunneqarpat, qinnuteqaat il.il. kalaallisuunngorlugu nutserneqassasoq, taamaaliortoqarpallu qinnuteqartup imaluunniit nalunaarutiginnittup aningaasartuutit akilissagai, Naalakkersuisut aamma aalajangersinnaavaat.

2.5 Nakkutilliineq

Kalaallit Nunaata isumannaatsuunissaata aamma tamat toqqissisimatinneqarnissaasa navianartorsiortinneqarnissaasa pitsaaliorneqarnissaannut tunngatillugu, nunanit allanit

anigaasaliinerit misissorneqarneri siunertarineqartut sunniteqassappata, misissuinerup anigaasaliinerit, siunnersuummi ilaatinneqartut, piunasaqaatit aalajangersarneqartut naapertorlugit naammassineqarnissaannut, sunniteqarluartumik nakkutiginninnermik malitseqartinneqarnissaat pingaaruteqarluinnarpoq.

Tamanna tunngavigalugu nunanit allanit anigaasaliinerit siunnersuummi ilaatinneqartut Naalakkersuisut nakkutilliivigissagaat aamma tamanna pillugu malittarisassanik erseqqinnerusunik aalajangersaasinnaasut, § 13, imm. 1-imi siunnersuutigineqarpoq. Aalajangersagassatut siunnersuutigineqartoq malillugu assersuutigalugu akuersissuteqarnissamik qinnuteqaammi aamma akuerineqarnissamik noqqaassumi paasissutissat eqqortuunerat, piunasaqaatit isumaqatigiissutigineqartut imaluunniit akuersissutini aalajangersarneqartut eqqortinneqarnerat aamma nalinginnaasumik nunanit allanit anigaasaliinerit pillugit, taakkunani akuersissummik qinnuteqartoqarsimanani imaluunniit akuerineqarnissamik noqqaassuteqartoqarsimanani, Naalakkersuisut nakkutilliisinnaassapput.

Tamanna pisariaqartinneqartut nalilernerqarpata, Naalakkersuisut aamma oqartussaasut allat sinniisaat nakkutilliinnermut- aamma nakkutiginninnermut atasumik suliaqarnerminnut atugassaminnik, pisariaqartumik qanoq iliorsinnaanermut uppersaateqarlutik aamma eqqartuussivimmit aalajangiinertaqanngitsumik inuussutissarsiornermut tunngasumik ininut aamma assartuutitut isersinnaatitaassasut, aammattaaq § 13, imm. 2-mi siunnersuutigineqarpoq.

Kalaallit Nunaanni immikkoortortat aamma anigaasaliisartut nunanit allaneersut tamatuma saniatigut imm. 2 malillugu nakkutilliinernut- nakkutiginninnernullu suliaqatut sunniteqarluartumik naammassineqarnissaannut ikiutissapput, matumani paasissutissanik attuumassuteqartunik tunniunnerit, inuussutissarsiornermut tunngasumik ininut aamma assartuutitut isersinnaatitsineq aamma § 13, imm. 3-tut siunnersuutigineqartoq malillugu nakkutilliartornermi ikiuunneq ilanngullugit.

Tamanna naleqquttutut isigineqartillugu, Inatsisartut inatsisaat malillugu nakkutilliinerup aallartinneqarnissaa imaluunniit aallartinneqarsimanera, nakkutilliinnermit inerniliussat aamma aalajangiinernut allanut assigisaanik, Naalakkersuisut tamanut saqqummiussinnaasut, § 14-imi siunnersuutigineqarpoq.

2.6 Iliusereriikkanut kinguneqartitsinerit

Inatsisartut inatsisaata sunniteqarluartumik sunniteqarnissaa eqqarsaatigalugu iliuusereriikkanut kinguneqartitsinerit, nunanit allanit anigaasaliisunut, § 8-tut siunnersuutigineqartumik aamma § 11

malillugu naalakkiuteqarnermik itigartitsissummik imaluunniit inerteqquteqarnermik malinninngitsunut, aalajangersarneqarnissaat siunnersuutigineqarpoq.

Nunanit allanit aningaasaliineq, isumaqatigiissummit tunngaveqartoq, itigartitsinermut, inerteqquteqarnermut imaluunniit naalakkiuteqarnermut akerliusumik isumaqatigiissutigineqartoq imaluunniit attanneqartoq, akuusut akornanni atuutussaassuseqassanngitsoq, tamanna tunngavigalugu § 19, imm. 1-imi siunnersuutigineqarpoq.

Atortussaannngitsumik isumaqatigiissummut inatsisitigut sunniutit atortussaajunnaarsitsinermi sunniutit pillugit malittarisassat nalinginnaasut malippai, matumani akuusut akornanni akilersuutit utertinneqarnerisa pineqarnerat ilanngullugit.

§ 19, imm. 2-tut siunnersuutigineqartoq malillugu, suliniummut, nunamit allamit aningaasaliinermut tunngassuteqartumut, akuersissutip Kalaallit Nunaanni oqartussaasunit atulersinneqartup atorunnaarsinneqarnissaanut Naalakkersuisut periarfissaqarnissaat, aammattaaq siunnersuutigineqarpoq.

§ 11 malillugu nunamit allamit aningaasaliinerup atorunnaarsinneqarnissaa pillugu naalakkiut malinneqanngippat, siunnersuummi § 20 malillugu suliffeqarfimmi Kalaallit Nunaanni najugaqartumi, aamma nunanit allanit aningaasaliisup pineqartup naalakkersugaani, piginnittutut piginneqataassutip taasisinnaatitaanermut attuumassuteqartup atorunnaarsinneqarnissaa, Danmarkimi Erhvervsstyrelsimut Naalakkersuisut innersuussutigisinnaavaat. Kisianni Erhvervsstyrelsimi immikkut ittumik periarfissaliisummik peqartoqarnissaa piumasaqaataavoq, taannalu massakkuugallartoq pilersinneqarsimanngilaq. Periarfissaliisummik piumasaqaataasumik pilersitsinissamut naalagaaffimmi inatsisip akuersissutigineqarnissaa naatsorsuutigineqarpoq. Naalakkersuisut noqqaassuteqarnerisa kingorna Erhvervsstyrelsip taasisinnaatitaanerup atorunnaarsinneqarnissaanut periarfissaq taamaallaat atorsinnaagaa, naatsorsuutigineqarpoq. Taamaalilluni Inatsisartut inatsisaat malillugu Erhvervsstyrelsi nammineeirluni pisinnaatitaanngilaq.

3. PISORTANUT ANINGAASAQARNIKKUT ALLAFFISSORNIKKULLU KINGUNERISASSAT

Misissuinissamik aaqqissuussinerup pilersinneqarneranut ingerlanneqarneranullu siunnersuut Naalakkersuisunut annertuumik, massakkut killissarititaasut iluannit akilernerqarsinnaanngitsunik, aningaasartuutaassasoq nalilerneqarpoq.

Sulianik suliarinnittussanut immikkoortortaqaarfiup nutaap sananeqarneranut aamma ingerlaavartumik sulianik suliarinninnermut, inatsisilerinermut tunngasumik piginnaasaqarnernut,

ilitersuinernut nakkutilliinernullu, isumalluutinik pisariaqartitsinermut pingaarnertut aningaasartuuteqarnissami pineqarput. Sulianik suliarinninnermut atugassanik paasissutissanik katersivinni avataaneersuni namminerisamik pigineqartunut aningaasartuutit ingerlatsinermullu aningaasartuutit tassunga ilaapput. Taakkua saniatigut IT-kkut sulianik suliarinninnermut systemip, annertoorujussuarmik atortussanik isertugaataasunik isumaginnissinnaasup, ineriartortinneqarnissaanut ingerlanneqarnissaanut atasunik aningaasartuuteqassaaq.

Aaqqissuussinissatut siunnersuutigineqartumut siunnersuutip Naalakkersuisunut ukiumoortumik 2,0 mio.kr.-it 3,0 mio.kr.-illu eqqanni aningaasartuuteqarnerunermik kinguneqarnissaa, kiisalu IT-kkut systemit, IT-p ineriartortinneqarnerannut, ingerlatseqatigiiffiit paasissutissanik katersiviinut isersinnaanernut aamma aserfallatsaaliuinernut il.il. ingerlanneqarnerannut ukiumoortumik 1,0 mio.kr.-inik atuinissamik kinguneqarnissaa missiliorneqarpoq.

Namminneq akisussaaffimminnit ilaatigut aningaasaliinissamut misissuinissat pillugit suliat piviusut pillugit tusarniaanerit akissuteqarfiginerinik suliarinninnernut, oqartussaasut allat aammattaaq ikiuutaasussaapput. Suliassat taamaattut suliassanit allanit pilersinneqartut, oqartussasunut attorneqartunut aningaasartuuteqarnerunermik kinguneqarnissaat naatsorsuutigineqarpoq.

Aningaasartuutitut, Inatsisartut inatsisaat aamma malittarisassat taassuminnga atulersinneqartut malillugit manna malillugu oqartussaasut oqartussaasutut suliarinninnerannut atasunut, akiliutip akilernerqarnissaa pillugu Naalakkersuisut malittarisassanik aalajangersaanissamut piginnaatinneqarnissaannik siunnersuut imaqarpoq. Inatsisissatut siunnersuutip kingunerisaanik ningaasartuutaanerusut ilaannik akiliusit aningaasalersuisinnaanerit naatsorsuutigineqarpoq.

4. INUUSSUTISSARSIORTUNUT ANINGAASAQARNIKKUT ALLAFFISSORNIKKULLU KINGUNERISASSAT

Nunanit allanit aningaasaliisoq tassaassasoq nunanit allanit aningaasaliinernut il.il. akuersissummik qinnuteqartussaassasoq imaluunniit nalunaarummik tunniussisussaasoq, siunnersuummi takuneqarsinnaavoq. Kalaallit Nunaanni suliffeqarfinnut siunnersuut toqqaannartumik aningaasatigut imaluunniit allaffissornikkut kinguneqassanngitsoq, taamaammat nalilernerqarpoq. Taamaattoq Kalaallit Nunaanni aningaasaliiniarnermut siunnersuut pitsaanngitsumik kinguneqarsinnaasoq nalilernerqarpoq. Aaqqissuussinerit assingusut taamaattoq nunani allani aamma annertunerujartortumik siuariartortut ilisimaneqarput, taamaattoqarneralu sunniinerup annikillisinneqarnissaanut naatsorsuutigineqarpoq.

Siunnersuutip aningaasaqarnikkut allaffissornikkullu inuussutissarsiortunut toqqaannanngitsumik ilaatigut kinguneqarsinnaanissaa, taamaattoq nalilerneqarpoq. Suliani piviusuni piumasaqaatinik sukanninnginnerusunik isumaqatigiissuteqarneq imaluunniit aalajangiineq, pissarsiap akiata aalajangersarneqarneranut ajortumik sunnerneqarneratut ilusilimmik aamma taamaammat Kalaallit Nunaanni suliffeqarfiup aningaasaliinermi iluanaarutaanut toqqaannanngitsumik kinguneqartitsisinnaavoq.

Tamatuma saniatigut ingerlatsinissamik isumaqatigiissutit il.il. misissuiffigineqarneri, Kalaallit Nunaanni niuerfimmi nunanit allanit sullissinissamik tuniniaasut sunnerneqarnerisigut, toqqaannanngitsumik kinguneqartitsisinnaapput, taamaattoqarneratalu taamaalilluni unammilleqatigiinneq ajortumik sunnersinnaavaa, aamma taamaammat akit aalajangersarneqartarnerat sunnersinnaallugu.

Ilaatigut akuersissutitut piumasaqaatit eqqortinneqarnerannik nakkutilliinissamut periarfissaq aaqqissuussinikkut aammattaaq eqqunneqassaaq. Nakkutilliineq Kalaallit Nunaanni suliffeqarfinnut allaffissornikkut annikinnerusunik aamma pingaaruteqanngitsunik kinguneqarsinnaanera naatsorsuutigineqarpoq, taakkulu aningaasaliisumit nunami allamiumit paasissutissat uppersarsarniarlugit paasissutissanik piumaffigineqarsinnaassapput, aamma pisuni immikkut ittuni nakkutilliiffiartorneqarsinnaassallutik.

5. AVATANGIISINUT, PINNGORTITAMUT INUILLU PEQQISSUSAANNUT KINGUNERISASSAT

Avatangiisinut, pinngortitamut inuillu peqqissusaannut siunnersuut kinguneqassanngilaq.

6. INNUTTAASUNUT KINGUNERISASSAT

Innuttaasunut siunnersuut kinguneqassanngilaq..

7. KINGUNERISASSAT PINGAARNERIT ALLAT

Kingunerisassanik pingaarnernik allanik siunnersuut kinguneqanngilaq.

8. OQARTUSSAASUT SULINIAQATIGIIFFIIT IL.IL. TUSARNIAAVIGINEQARNERAT

[NAALAKKERSUISUT IKKUTISSAVAAT]

Siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-imut

Aningaasaliinernut taamaattunut misissuinikkut aamma taamaattoqassappat akuliunnikkut, nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortinneqarnissaasa pitsaaliorneqarnissaat, Inatsisartut inatsisaata siunertarissagaa, imm. 1-imi siunnersuutigineqarpoq.

Nunanit allanit aningaasaliinerit, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartut, oqartussaasunit akuliuffigineqarsinnaanerannut periarfissaliissutip pilersinneqarnissaa, siunnersuutikkut siunnersuutigineqarpoq. Ilaatigut suliaasaqarfinnut immikkut ittunut misissuisarnissamik aaqqissuussinertut ilusilimmik, tassani suliaasaqarfinni suliniutinilu nunanit allanit aningaasaliinerit, § 4-tut siunnersuutigineqartoq malillugu immikkut ittumik malissarissusilittut nalilerneqartuni, ilaatigullu § 5-itut siunnersuutigineqartoq malillugu nunanit allanit aningaasaliinernut tunngassuteqartunut suliaasaqarfiit assigiinngitsut akornanni misissuisarnissamik aaqqissuussinertut ilusilimmik, tamanna atugassanngortinneqassaaq.

Nunanit allanit aningaasaliinerit nalilersuiffigineqarnissaannik, misissorneqarnissaannik, akuerineqarnissaannik, piumasaqaateqarfigineqarnissaannik, inerteqquteqarfigineqarnissaannik imaluunniit atorunnaarsitsinissamik naalakkiuteqarfigineqarnissaannik, “misissuineq” ingerlatseriaatsit paasineqassaaq.

Kalaallit Nunaata isumannaatsuunissaa imaluunniit tamat toqqissisimatinneqarnissaat eqqarsaatigalugit, nunanit allanit aningaasaliinerit taamaallaat akuliuffigineqarsinnaasussaapput. “Kalaallit Nunaata isumannaatsuunissaa” aamma “tamat toqqissisimatinneqarnissaat” pillugit oqaatsit imarisaasa paasineqarnissaat pineqartillugit, siunnersuummi § 3 aamma tassunga oqaaseqaatit innersuussutigineqarput.

Inatsisartut inatsisaat nunanit allanit aningaasaliinernut atuutissasoq siunnersuutigineqarpoq. Taamaalilluni aningaasaliinerit suussusaannut atituunut imaluunniit aalajangikkanut allanut, immikkoortortaqaqarfinni Kalaallit Nunaanni angerlarsimaffeqartumi pissaaneqarfeqarnermik imaluunniit sunniuteqarsinnaanermik kinguneqartunut, imaluunniit Kalaallit Nunaanni suliniutinut

allanut, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasunut, Inatsisartut inatsisaat atuutissaaq. Tamanna pillugu siunnersuummi § 3, nr. 5 aamma tassunga oqaaseqaatit innersuussutigineqarput.

Imm. 2-mut

Aningaasaliineq aningaasaliisartunit nunanit allaneersunit nunanit allanit aningaasaliinernut eqqarsaatigineqartunut imaluunniit naammassineqartunut, Inatsisartut inatsisaat manna atuutissasoq, § 2-mi siunnersuutigineqarpoq.

Sumi nunami angerlarsimaffeqarnerat imaluunniit najugaqarnerat apeqqutaatinnagu, aalajangersagaq malillugu aningaasaliisartunut nunanit allaneersunut Inatsisartut inatsisaat atuuppoq, matumani aamma aningaasaliisartuq nunanit allaneersuq Kalaallit Nunaanni angerlarsimaffeqarpat imaluunniit aalajangersimasumik ingerlatsiveqarpat. Taamaalilluni pisuni, taakkunani immikkoortortaarfik Kalaallit Nunani angerlarsimaffeqarani, aamma taakkunani immikkoortortaarfik Kalallit Nunaanni angerlarsimaffeqarluni, kisianni suliffeqarfiulluni ingerlatseqatigiiffittut piginnittumit aalajangiisutut sunniuteqarfigineqartoq imaluunniit nunamit allamit suliffeqarfiup immikkoortortaqarfiulluni, imaluunniit, tamanna pillugu inatsisissatut siunnersuummi § 3 tassungalu oqaaseqaatit malillugit, nunamit allamit aningaasaliisoq allakkut Kalaallit Nunaanni immikkoortortami pissaaneqarfeqarpat imaluunniit annertuumik sunniuteqarpat, Inatsisartut inatsisaat aamma atuutissaaq.

§ 3-mut

Inatsisartut inatsisaata paasineqarnissaanut qitiutinneqartussanik, kisianni aamma qaqugukkut misissuinissamik aaqqissuussinerup atorneqarnissaanut tunngatillugu, kiisalu Kalaallit Nunaata isumannaatsuunissaa imaluunniit tamat toqqissisimatinneqarnissaa innersuussutigalugu qaqugukkut akuliuttoqarsinnaanersoq pillugit, Inatsisartut inatsisaata atuuffissaanut nassuiaanerit arlallit aalajangersagassatut siunnersuutigineqartup kingunerai.

Nr. 1-imut

Iluseq aaqqissuussinermut atorneqartoq apeqqutaatinnagu, suliffeqarfiit inuussutissarsiutillit aamma suliffeqarfiit inuussutissarsiutiginnagu suliffeqarfiusut tamarnik, pisortani oqartussaasut, aningaasaateqarfiit, peqatigiiffiit, sullissiviit il.il. “immikkoortortaarfik”-ttut paasineqassasut, § 3, nr. 1-mi siunnersuutigineqarpoq.

Nr. 2-mut

Pissutsit Kalaallit Nunaata nunakkut, immakkut imaluunniit silaannakkut killeqarfiisa innarligassaannginnerannut innuttaasullu ataannarnissaanut tunngassuteqartut, iliuutsit, Kalaallit Nunaata attaveqarfiinut soqutigisaanullu akornusersuinissamik navianartorsiortitsisut imaluunniit navianartorsiortitsisinnaasut, aamma iliuutsit Kalaallit Nunaannut ajoqusiinissamik siunertaqartut, “Kalaallit Nunaata isummaatsuunissaa”-tut paasineqassasut, nr. 2-mi siunnersuutigineqarpoq.

Nr. 3-mut

Pissutsit, matumuuna Kalaallit Nunaata isumannaatsuunissaanut sunniuteqartinnagit, Kalaallit Nunaata, inuinnaat naalakkersueqataanerannut aamma inuiaqatigiit isumannaatsuunissaasa attassinissaanut tunngassuteqartut, “tamat toqqissisimatinneqarnissaat”-ttut paasineqassasut, nr. 3-mi siunnersuutigineqarpoq.

Pinerluttuliornerit ilungersunartut allat, pinerluttulerinermi inatsimmi kapitali 7-imi aamma 8-mi ilaatinneqartunit allannerusut, kisianni aamma, matumuuna Kalaallit Nunaata isumannaatsuunissaa navianartorsiortinneqanngikkaluartoq, tamat toqqissisimatinneqarnissaannut annertuumik navianartorsiortitsisinnaasut, pineqarsinnaapput.

Tamatuma saniatigut, suliniutinut isumannaatsuunissamut navianartorsiortitsisut pitsaaliorneqarnissaannut, qulaajaavigineqarnissaannut aamma akiorneqarnissaannut piginnaasaqarnermut, aamma inuiaqatigiinni tamanit oqartussaaqataaffiusuni tunngaviusumik malittarisassanut naleqartitanullu naapertuuttumik isumannaatsuutitsinissamut suliniutit naammassineqarnissaannut piginnaasaqarneq, tamat toqqissisimatinneqarnissaannik eqqarsaatiginninnermut tunngassuteqarsinnaapput.

Tamat toqqissisimatinneqarnissaannut navianartorsiortitsinerni ilaatigut iliuutsit, nr. 2 malillugu ima suussuseqanngillat Kalaallit Nunaata isumannaatsuunissaanut attuillutik, kisianni inuiaqatigiit nalinginnaasumik ingerlasinnaaneranut sunniisinnaallutik, assersuutigalugu attaveqaasersuutit pingaaruteqartut, inuiaqatigiinni toqqissisimanissap isumannaatsuunissallu attanneqarnissaanut inuiaqatigiinni ingerlasinnaanerannut annertuumik pingaaruteqartut sunnerneqarnerisigut, assersuutigalugu nukissiuutinik- imaluunniit imermik pilersuinerup iluani imaluunniit peqqinnissaqarfimmi, imaluunniit tusagassiuutit tusagassiortullu arlaannaannulluunniit attuumassuteqanngitsut siorasaarneqarnerisigut.

Assersuutit tamakkiisuunngimmata maluginiarneqassaaq, tassami tamat toqqissisimatinneqarnissaannut eqqarsaatiginninneq pissutsit piviusut malillugit, suliassaqarfinnut, inuiaqatigiinnut tunngasumik aamma isumannaatsuunissamut tunngasumik annertuumik pingaaruteqartunut, aamma tunngassuteqarsinnaapput.

Nr. 4-mut

Nr. 4-tut siunnersuutigineqartumi, “Nunanit allanit aningaasaliineq”ima nassuiarneqarpoq:

- a) Immikkoortortami Kalaallit Nunaanni angerlarsimaffeqartumi, piginnittutut piginneqataassutini imaluunniit taasisinnaatitaanernik minnerpaamik 25 pct.-iusunik toqqaannartumik imaluunniit toqqaannanngitsumik pigisaqarnermik imaluunniit pissaaneqarfeqarnermik angusineq.
- b) immikkoortortami Kalaallit Nunaanni angerlarsimaffeqartumi, piginnittutut piginneqataassutsip annertussusaanik imaluunniit taasisinnaatitaanernik toqqaannartumik imaluunniit toqqaannanngitsumik minnerpaamik pingajorarterutinut, 50 pct.-inut, pingajorarterutinut marlunnut imaluunniit 100 pct.-imut qaffaaneq imaluunniit pissaaneqarfeqarneq, imaluunniit
- c) immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliassa qarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarneq kiisalu
- d) Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisumik Kalaallit Nunaanni suliniummik allamik tigusineq imaluunniit aallartitsineq.

Pissaaneqarfeqarneq toqqaannartuusinnaasoq imaluunniit toqqaannanngitsuusinnaasoq, imaappoq suliffeqarfiit allat aqutigalugit, taamaattoqassappallu nunani assigiinngitsuni allanit, piginnittutut uiguleriaartut taaneqartartut aqutigalugit tamanna pisinnaasoq, litra a-mi nassuiaatissatut siunnersuutigineqartup kinguneraa. Aammattaaq suliffeqarfimmik pilersitsinermi nassuiaat aamma atorneqassaaq.

Pissarsineq qanoq pisimansoq apeqqutaanngilaq. Taamaalilluni taasisinnaatitaanerit, aningaasaatit, immikkut ittumik pisinnaatitaanerit pissarsiarineqarnerat, kattunnerit, avitsinerit, pisiariortuinerit, matumani tiguserit, tamakkiisumik imaluunniit ilaannakoortumik niuerfimmik suliassa qarfiusumik tiguserit aamma »asset deals-inik (suliffeqarfinnik pisinernik)« taaneqartartut, suliffeqarfiup pingaarnertut pigisaanik nalilinnik imaluunniit ataqatigiisumik ingerlatsinera ilaatinneqarlutik, nassuiaanermi ilaatinneqarput.

Piginnittutut piginneqataassutsip piviusup annertussusaanik imaluunniit taasisinnaatitaanernik agguagarsiat agguagarsianit suli allanit pissarsinikkut minnerpaamik pingajorarterummik, 50 pct.-imik, pingajorarterutini marlunnik imaluunniit 100 pct.-imik qaffanneqarpata, Inatsisartut inatsisaat atuutissasoq, litra b-mi nassuiaatissatut siunnersuutigineqartup kinguneraa.

Litra c-tut siunnersuutigineqartoq malillugu immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliassa qarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarnermik angusineq, Inatsisartut inatsisaata atuuffissaani ilaatinneqarpoq.

»Aallakkut« toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarnermik angusineq, atituutut paasineqassaaq, aamma ilaatigut pigisanik nalilinnik pisinerit, taarsigassarsiat sivisuumik akilersugassat imaluunniit taamaatiinnarneqarsinnaanngitsut, attartornissaq pillugu isumaqatigiissutit, ingerlatsinissaq pillugu isumaqatigiissutit, tunniussinissaq pillugu isumaqatigiissutit aamma ilisimatusarneq pillugu suleqatigiinnerit ilaatinneqarsinnaapput.

Naliginnaasumik aqutsisut aalajangigaannut tunngatillugu aalajangiisuusumik pissaaneqarneq taamaallaat nassuiarneqanngilaq, taamaalilluni ingerlatseqatigiiffiit inatsiseqartinneqarneranni pissaaneqarfeqarnerup nassuiarneqarnera ilisimaneqarpoq, kisianni aamma aningaasaqarnermut-, ineriartortitsinermut- imaluunniit ingerlatsinermut immikkoortorta qarfimmi pissutsinut tunngasumik aalajangiisuusumik pissaaneqarnertut ilisimaneqarluni. Aningaasaliisoq nunanit allaneersoq pissutsini taaneqartuni taamaallaat ataasiinnarmi aalajangiisuusutut pissaanermik angusisussatut nalilerneqarpat, nassuiaanertut siunnersuutigineqartoq malillugu aalajangiisuusumik pissaaneqarneq pineqassaaq, aamma naak pissaaneqarneq nalinginnaasumik immikkoortorta qarfiup aqunneqarneranik ilaatitsinngikkaluartoq.

Taamaattoq immikkoortorta qarfiup pissutsinut taaneqartunut aalajangiinera aalajangiisuusumik pissaaneqarnermut tunngatinneqassaaq, aamma taamaalilluni aqutsisunut tunngatillugu pissaaneqarfeqarneq pineqassaaq. Aningaasaliisup nunamit allameersup pissutsinut ilaatinneqartunut immikkoortorta qarfimmi sunniuteqaqataasinnaanermik angusinera naammannaviannngilaq, tassami aalajangiisuusumik pissaaneqarneq pineqartussaavoq, imaappoq immikkoortorta qarfiup pissutsit pineqartut pillugit aqutsinermut tunngatillugu piginnaasaqarneq tunniutissammagu.

Oqaasertaliorneqarnissaanut siunnersuutigineqartoq malillugu aalajangiisuusumik pissaaneqarneq immikkoortorta qarfimmi suliassa qarfinnut ingerlatsinermut pingaaruteqartunut tunngassuteqarnera naammappoq. Aalajangiisuusumik pissaaneqarneq taamaalilluni immikkoortorta qarfimmut

tamarmiusumut imaluunniit immikkoortortaqrarfiup ineriartortitsinermik suliniutaanut tamanut imaluunniit ingerlatsineranut pissutsinut tunngassuteqarnissaa pisariaqanngilaq. Aningaasaliisartoq nunamit allameersoq ineriartortitsinermik suliniummut ataatsimut, immikkoortortaqrarfiup siunissami alliatornissaanut periarfissaanut pingaaruteqartumut, naalakkersuisinnaaneq anguppagu, nassuiaanissatut siunnersuutigineqartoq malillugu aalajangiisuusumik pissaaneqarneq pineqassaaq. Aningaasaliisartoq nunamit allameersoq ingerlatsinermut atuuffimmik, immikkoortortaqrarfiup ataatsimut ingerlatsineranut pingaaruteqartumik aalajangiisuusumik pissaanermik angusippat, tamanna aamma pissaq.

Tamatuma saniatigut aningaasaliisartoq nunamit allameersoq, assersuutigalugu ingerlatsinissamik isumaqatigiissummik assigisaanilluunniit immikkoortortaqrarfimmik, pisiortorfimmit allamit ajornakusoortumik taarserneqarsinnaasumik, Kalaallit Nunaanni angerlarsimaffeqartumik isumaqatigiissuteqarsimappat, imaluunniit isumaqatigiissut ukiunut arlalinnut taamaatinneqarsinnaanngitsutut pissuseqartumik aamma taamaammat sivisuumik atavallaarnermik kinguneqartumik, isumaqatigiissuteqarsimappat, aalajangiisuusumik pissaaneqarneq pineqarsinnaavoq. Aamma, aningaasaliisartoq nunamit allameersoq isumaqatigiissutip malitsigisaanik assersuutigalugu Kalaallit Nunaanni immikkoortortaqrarfimmi timitalerlugu imaluunniit elektroniskiusumik ingerlatsinerup imaluunniit ingerlatsinermi pingaaruteqartunik ingerlatsinerup ilaanik akornusersuineramik akuliussinnaappat, aamma tamanna Kalaallit Nunaata isumannaatsuunissaanut imaluunniit tamat toqqissisimatinneqarnissaannut pingaaruteqarpat, aalajangiisuusumik pissaaneqarneq pineqarsinnaavoq.

Kalaallit Nunaanni suliniummik allamik, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasumik, tigusineq imaluunniit aallartitsineq, litra e-tut siunnersuutigineqartumi ilaatinneqarpoq.

Pisuni, taakkunani Kalaallit Nunaanni suliniummik allamik, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasumik, tigusinerni imaluunniit aallartitsinerni, litra d-tut siunnersuutigineqartoq atuutissaaq, kisianni immikkoortortaqrarfimmut Kalaallit Nunaanni angerlarsimaffeqartumut litra a-miit c ilanngullugu ilaatinneqartumut, tamatuma peqatigisaanik piginninneq, naalakkiisinnaaneq imaluunniit aalajangiisuusumik pissaaneqarneq taakkunani anguneqarani.

Taamaalilluni suliniutinut allanut, siunnersuutip allakkut atuuffissaata avataaniittunut, kisianni Kalaallit Nunaata isumannaatsuunissaanut imaluunniit tamat toqqissisimatinneqarnissaannut taamatuttaaq navianartorsiortitsisunut, akuliunnissamut aalajangersagaq atorsinnaatitaavoq.

Aalajangersakkap atuuffissaa atituumik paasineqassaaq aamma aningaasatigut aalajangiinnerit suugaluartulluunniit ilaatissinnaavai, matumani ilisimatusarneq- aamma nutaaliorneq pillugit suleqatigiinnerit, sumiiffinni pingaaruteqartuni pigisanut nuunneqarsinnaanngitsut naalakkiisinnaaneq aamma pissaaneqarneq, suliniutit, akuersissutinik pissarsinerit il.il. Assersuutigalugu pisoq tassaasinnaavoq, immikkoortortaqaqfimmik Kalaallit Nunaanni angerlarsimaffeqartumik pilersitsisoqarani imaluunniit tiguisoqarani, aamma malittarisassat malillugit akuersissutip atuutilersinneqarsimasup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera eqqarsaatigalugu, tunniunneqarnissaa pitsaaliorneqarsinnaanani.

Nr. 5-imut

“Aningaasaliisartoq nunamit allameersoq” ima paasineqassasoq, inuk, qallunaat naalagaaffianni innuttaasutut pisinnaatitaanngitsoq, imaluunniit qallunaat naalagaaffianni innuttaasutut pisinnaatitaasoq, kisianni ukiut 5 sioqqullugit Kalaallit Nunaanni aalajangersimasumik najugaqarsimanngitsoq, aamma Kalaallit Nunaannut tamakkiisumik akileraartussaataitaanngitsoq aamma ukiut ilivitsut 5 sioqqullugit Kalaallit Nunaannut tamakkiisumik akileraartussaataitaasimasoq, imaluunniit inatsisitigut pisinnaatitaasoq pisussaataasorlu, Kalaallit Nunaanni angerlarsimaffeqanngitsoq, kiisalu nunani oqartussaasut aamma nunani allani naalagaaffiup sullissivii, nr. 5-imi siunnersuutigineqarpoq. Matumuuna aamma Danmarkimi Savalimmiunilu nunat oqartussaasut aamma naalagaaffiup sullissiviitut tamanna paasineqassaaq.

Inatsisitigut pisinnaatitaasut pisussaataasullu, aningaasaliisartoq nunamit allameersoq nunami sumi angerlarsimaffeqarneris apeqquatainnagu, Kalaallit Nunaanni angerlarsimaffeqanngitsoq kinaagaluartorluunniit nassuiaammi ilaatinneqarpoq, matumani aamma aningaasaliisartoq nunamit allameersoq Kalaallit Nunaanni aalajangersimasumik ingerlatsiveqarpat, tassani ilaatinneqarpoq. Pisuni immikkoortortaqaqfinnut, immikkoortortaqaqfik Kalaallit Nunaanni angerlarsimaffeqanngitsillugu Inatsisartut inatsisaat aamma taamaalilluni atuutissaaq. Aamma tassani immikkoortortaqaqfik Kalaallit Nunaanni angerlarsimaffeqarluni, kisianni nunami allami suliffeqaqfimmik suliffeqaqfiulluni ingerlatseqatigiiffittut piginnittumit aalajangiisutut sunniuteqaqfigineqartutut imaluunniit nunamit allamit suliffeqaqfiup immikkoortortaqaqfiulluni, Inatsisartut inatsisaat aamma atuutissaaq. Aningaasaliisoq nunamit allameersoq allakkut Kalaallit Nunaanni immikkoortortami pissaaneqarfeqarpat imaluunniit annertuumik sunniuteqarpat, Inatsisartut inatsisaat aamma atuutissaaq.

Inuup imaluunniit inatsisitigut pisinnaatitaasup pisussaataasulluunniit suliffeqaqfimmik ingerlatseqatigiiffittut piginnittumit aalajangiisutut sunniuteqaqfigineqartumik, nunamit allamit

suliffeqarfiup immikkoortortaarfianik, imaluunniit Kalaallit Nunaanni aalajangersimasumik ingerlatsivimmik pilersitsisimanera, sullissisup Kalaallit Nunaanni nunassissimasutut imaluunniit angerlarsimaffeqartutut isigineqarneranik kinguneqanngilaq.

Suliffeqarfiup nunami pineqartumi nalunaarsorneqarsimaneranik imaluunniit aalajangersakkanut naalakkersugaanermut tunngasunut tunngatillugu angerlarsimaffeqarnera “nuna angerlarsimaffik”-ttut paasineqassaaq. Ingerlatseqatigiiffinnut inatsimmi, Kalaallit Nunaannut atuutilersinneqartumi, taaguusersuutitut taassuma assigaa.

§ 4-mut

Imm. 1-imut

Aningaasaliisartoq nunami allameersoq, imm. 2-mi ilaatinneqartuni suliaasaqarfinni suliniutinilu immikkut ittumik malussarissuseqartuni, nunamit allamit aningaasaliinissap naammassineqarnissaanik siunertaqartoq, aningaasaliinermut akuersissuteqarnissaq pillugu siuningaani Naalakkersuisunut qinnuteqassasoq, imm. 1-imi siunnersuutigineqarpoq.

§ 3, nr. 5-itut siunnersuutigineqartoq, aamma tassunga oqaaseqaatit malillugit, nunamit allamit aningasaliinissap eqqarsaatigineqartup naammassineqarnissaanut akuersissut pillugu qinnuteqarnissamik aningaasaliisartup nunamit allameersup pisussaaffeqarnera, aalajangersagassatut siunnersuutigineqartup kinguneraa.

Aningaasaliisartumut nunamit allamiumut pisussaaffik taamaallaat pisussaaffiuvoq. Aningaasaliisartup nunamit allameersup aningaasaliinerup naammassineqarnissaanut akuersissummik angusisimanerata qulakkeerneqarnissaanut tunngatillugu, Kalaallit Nunaanni immikkoortortami, aningaasaliinerup suliarineqarfiani, pisussaaffinnik pisussaataaasoqanngilaq.

Imm. 2-mut

Imm. 1-imi taaneqartutut, Kalaallit Nunaata isumannaatsuunissaanut imaluunniit tamat toqqississimatinneqarnissannut tunngatillugu, suliaasaqarfinni suliniutinillu immikkut ittumik malussarissusilinni tulliuttut ilaatinneqarput:

- 1) Illersornissamut suliaasaqarfiup iluani suliffeqarfik.
- 2) It-kkut isumannaatsuunissamut atuuffiit iluanni imaluunniit paasissutissat isertuussat suliarineqarnerannut suliffeqarfik.
- 3) Suliffeqarfik nioqqutissianik marloqiusamik atorneqarsinnaasunik nioqqutissiortoq.
- 4) Nr. 1-imiit 3 ilanngullugu taaneqartunit allaanerusumik teknikkikkut atortorissaarutit pingaarutillit allat pillugit suliffeqarfik.

- 5) Attaveqaasersuutit pingaarutillit.
- 6) Aatsitassanut suliassa qarfik.
- 7) Ingerlatseqatigiiffiit Namminersorlutik Oqartussanit pigineqartut.
- 8) Imermik nukissiorfiit

Imm. 3-mut

Suliassa qarfiit suliniutillu imm. 2-mi ilaatinneqartut killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaasut, *imm. 3-mi* siunnersuutigineqarpoq.

Suliassa qarfinniit suliniutillu immikkut ittumik malussarissusillit imm. 2-mi takuneqarsinnaasut pillugit malittarisassat erseqqinnerusumik nassuiaasut aamma killiliisut aalajangersarneqarnissaannut imm. 3-mi piginnaatitsissutip atorneqarnissaa naatsorsuutigineqarpoq. Taamaalilluni suliassa qarfinnik suliniutinillu imm. 2-mi allattorneqartuni, malittarisassat annertusineqarnissaannut piginnaatitsissut atorneqarsinnaassanngilaq.

Imm. 2-mi suliassa qarfiit suliniutillu immikkut ittumik malussarissusillit pillugit malittarisassanik erseqqinnerusunik aalajangersaanikkut tulliuttut pingartinneqarnissaat siunertarineqarpoq:

Illersornissamut suliassa qarfiup iluani suliffe qarfiit pineqartillugit, tamanna suliffe qarfinnut, sakkunik, sorsunnermi atortussanik ineriartortitsisunut imaluunniit tunisassiortunut, imaluunniit sakkutooqarnermut atortussanik teknikkikkut atortorissaaruteqarnernik, killilerneqarnissaa siunertarineqarpoq.

Suliffe qarfiit marloqiusamik atorneqartussanik (nioqqutissianik dual-use-iusunik) nioqqutissianik nioqqutissiortut pineqartillugit, immikkoortorta qarfinnut, nioqqutissianik marloqiusanik atorneqarsinnaasunik, imaappoq nioqqutissianik inunni sakkutuujunngitsuni aamma sakkutooqarnermi atorneqarsinnaasunik nioqqutissiortunut killilerneqarnissaat siunertarineqarpoq. Nioqqutissianut marloqiusamik atorneqartussanut killiliineq, Siunnersuisoqatigiit peqqussutaanni (EF) nr. 428/2009, aamma tassani nioqqutissiat dual-use-iusut peqqussummut ilanngussaq I-imi allanneqarsimallutik, taanna nakkutigisassanut allattuiffittut taaneqartarpoq, kingusinnerusukkullu allannguutai, naapertorlugit nassuiarneqarsinnaassaaq, kisianni nassuiaanermut tassunga Naalakkersuisut pituttugaanngillat.

It-kkut isumannaatsuunissamut atuuffilinnut suliffe qarfinnut nioqqutissianik, paasissutissanut isertuussaasunut atorneqartussanik, nioqqutissiortut pineqartillugit, suliffe qarfinnut nioqqutissianik it-kkut isumannaatsuunissamut atuuffilinnut imaluunniit sullissinernik, paasissutissat isertuussat

suliarineqarnissaannut atorneqartunut, ineriartortitsisunut, nioqqutissiortunut imaluunniit aserfallatsaalisunut, killilerneqarnissaa siunertarineqarpoq.

Suliffeqarfiit teknikkikkut atortorissaarutini pingaarutilinnik allanik nioqqutissiortut pineqartillugit, teknikkikkut atortorissaarutit pingaaruteqartut, sakkunik avammut tuniniaaneq pillugu malittarisassani imaluunniit dual-use pillugu peqqussummi nakkutigisassat allattorsimaffiani ilaatinneqanngitsut, kisianni assigisaanik pingaaruteqartunngorsinnaasut, pineqassapput. Assersuutigalugu silassorissuusiaqarnerup iluani, robottit pillugit teknikkikkut atortorissaarusiormi, 3D atorlugu naqitsisarni, silaannakkut- aamma avataarsuani angallassinerni aamma nukissiuutit toqqorsivimmiitinneqarnissaasa, kvante- aamma nuklearteknologi-p iluanni teknikkikkut atortorissaarutit nutaatut ineriartortitat, massakkuugallartoq avammut tunisineri nakkutilliisarnermut malittarisassani ilaatinneqanngitsut, kisianni ilaatinneqartussatut eqqarsaatigineqartut pineqarsinnaapput.

Attaveqaasersuutit pingaarutillit pineqartillugit oqaatsip “attaveqaasersuutit” atituumik paasineqarnissaa naatsorsuutigineqarpoq, taamaalluni atortorissaarutit, systemit, ingerlatsinerit teknikkikkut atortorissaarusiormi, pigisat nalillit aamma sullissinerit ilaatinneqassapput. Inuiaqatigiinni atuuffiit pingaarutillit attannissaannut imaluunniit atulerseqqinnissaannut taakku pisariaqartinneqarpata, attaveqaasersuutit “pingaaruteqartut” nalilerneqassapput. Sullissiviit inuiaqatigiinnut pingaaruteqartut iluanni, inuiaqatigiinni atuuffiit pingaarutillit attanneqarnissaannut imaluunniit atulerseqqinneqarnissaannut pingaaruteqartut, attaveqaasersuutini pingaaruteqartuni suliffeqarfiit immikkoortortaqrifiillu ilaatinneqarput. Suliassaqrifiit tulliusut inuiaqatigiinnut pingaaruteqartut pinngitsooratik isigineqassapput: nukissiuutit (gassi, innaallagiat, uulia, imeq, paasissutissiinnermut- aamma attaveqaqatigiinnermut teknikkikkut atortorissaaruteqarneq, angallassineq, upalungaarsimaneq aamma inuit sakkutuujunngitsut illersorneqarnerat, peqqissuseq, inooqatigiinnut tunngasut, nioqqutissiat pingaaruteqartut, imissaq aamma nerisassat, imeq minguttoq, aningaasaqarneq aamma aningaasarsiorneq, ilinniarnaq aamma ilisimatusarneq, silasiorneq, illersornissaqarfimmut nioqqutissiorneq kiisalu naalagaaffiup isertortumik paasiniaainnermut- aamma isumannaatsuunissamut sullissisui, nunanut allanut sullissivik, nalinginnaasumik oqartussaasuunermik suliqarneq kiisalu oqartussaaffeqarfiit assigiinngitsut akornanni ajornartoormik aqutsineq.

Suliassaqrifinnut suliniutinullu immikkut ittumik malussarissusilinnut (nr. 1-imiit 5 ilanngullugu) attaveqaasersuutini pingaaruteqartuni taamaallaat suliffeqarfiit ilaatinneqanngillat, kisianni attaveqaasersuutitut pingaaruteqartunut atassuteqartumik suliniutit tamarmik ilaatinneqarput. Assersuutigalugu attaveqaasersuutit Kalaallit Nunaani oqartussaasunit pigineqartut, taakkunani allakkut aningaasaliisartoq nunamit allameersoq, § 3, nr. 4, litra c-tut siunnersuutigineqartoq

malillugu pissutsit aqutsinermut, aningaasaqarnermut, ineriartortitsinermut imaluunniit ingerlatsinermut tunngassuteqartut pillugit toqqaannartumik imaluunniit toqqaannangitsumik aalajangiisuusumik pissaanermik angusisoq, taamaalilluni ilaatinneqarpoq.

Aatsitassanut suliassa qarfik pineqartillugu, tassani Aatsitassat pillugit ingerlatallu tamatumunnga pingaarutillit pillugit Inatsisartut inatsisaat (aatsitassanut ikummatissanullu inatsit) 7, 7. december 2009-imeersoq aamma Najukkani aatsitassanut tunngasunik suliaqarnerit pillugit Inatsisartut inatsisaat nr. 34, 4. juni 2024-imeersoq malillugit akuersisummik peqartut imaluunniit piumasagaateqarfigineqartut suliffeqarfiit ilaatinneqarput.

Kalaallit Nunaanni nunap inissisimanerata immikkut ittuq, pisortanit pilersuisussaataitaneq kinguneraa, tassani gruppinit imaluunniit suliassa qarfinnut, niuerfimmit killilersugaanngitsumit aamma malittarisassiugaanngitsumit tunngaviusumik sullissinernik ikiuutinillu neqeroorfigineqannginnissaat ilimananngitsorujussuulluni, imaluunniit tunngaviusumik sullissinernut ikiuutinullu ullumikkumut naleqqiullu akiliinerujussuusussaallutik, tunngaviusumik sullissinerit ikiuinerillu neqeroorutaanissaat qulakkeerneqarluni. Pisarnertut tamanna namminersorlutik oqartussat ingerlatsiviinit qulakkeerneqartarpoq.

Ingerlatsiviit suugaluartulluunnit, Namminersorlutik Oqartussat toqqaannartumik imaluunniit toqqaannangitsumik piginnittutut piginneqataassutsit imaluunniit taasisinnaatitaanerit 50 pct.-ii sinnerlugit pigineqarnerattut, “ingerlatseqatigiiffiit namminersorlutik oqartussanit pigineqartut”-tut paasineqassaaq.

“Imermik nukissiorfiit” pineqartillugit tassani imermik nukissiorfiit suussusaat tamarmik ilaatinneqarput, matumani imermik nukissiorfiit niuernerpalaartumik atorluarneqartut ilanngullugit.

§ 5-imut

Aningaasaliinissap eqqarsaatigineqartup imaluunniit aningaasaliinerup naammassineqartup, suliassa qarfinnut suliniutinullu, § 4-tut siunnersuutigineqartumi allatorneqartutut, immikkut ittumik malissarissuseqartuni ilaatinneqanngitsut pillugit akuersisummik aningaasaliisartup nunamit allameersup Naalakkersuisunut noqqaassutigisinnaagaa, § 5-imi siunnersuutigineqarpoq.

Aalajangersakkat siunnersuutigineqartut suliassa qarfiit assigiinngitsut akornanni misissuinissamik aaqqissuussinermut killiussat aalajangersarpaat, tamatumalu kingorna aningaasaliisartoq nunamit allameersoq nammineq kajumissutsini malillugu nunamit allamit aningaasaliineq nalunaarutigisinnaavaa.

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera nalornissutigineqarpat, aningaasaliisartup nunamit allameersup taamaallaat nammineq kajumissutsini malillugu nunamit allamit aningaasaliineq nalunaarutigissagaa, aalajangersakkami siunertarineqarpoq. Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat, aalajangersakkap taamaalilluni kingunerinngilaa. Nunamit allanit aningaasaliinerup naammassineqarsinnaannginnera, taamaalilluni nalunaaruteqannginnerup kingunerinngilaa.

Nalunaaruteqarnissap suliarineqarnera nammineq kajumissuseq malillugu suliarineqassaaq, aamma nalunaaruteqarneq nunamit allamit aningaasaliinermut eqqarsaatigineqartumut aamma nunamit allamit aningaasaliinernut naammassineqareersunut tunngassuteqarsinnaavoq. Nalunaaruteqarnikkut aningaasaliisoq – aamma nunanit allanit aningaasaliinerni naammassineqareersuni – oqartussaasut aningaasaliinermik akuersissuteqarsinnaanerannut aamma taamaalilluni tulliusumik Kalaallit Nunaata isumannaatsuunissaanut imaluunniit tamat toqqissisimatinneqarnissaanut eqqarsaatigisassat aallaavigalugit aningaasaliinermut akuliutinnginnissaannik pisariaqartinneqartumik qularnaveeqqummik angusaqarsinnaassaaq. Taamaalilluni § 6-itut siunnersuutigineqartumut siunnersuut atatillugu isiginiarneqassaaq, tassani nunanit allanit aningaasaliinerit, akuerineqartussatut nalunaarutigineqarsimanngitsut, aningaasaliinerup naammassineqarnerata kingorna ukiut 5 tikillugit misissorneqarnissaannut Naalakkersuisut periarfissaqarnissaat siunnersuutigineqarluni.

Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat § 5-itut siunnersuutigineqartup kingunerinngilaa. Aningaasaliisup nunami allameersup, aningaasaliinerup imaluunniit suliniutip Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu nalornissuteqartup, akuersissuteqarnissaq pillugu noqqaassuteqarnikkut erseqqissumik paasisaqarsinnaanera, § 5-itut siunnersuutigineqartumi nammineq kajumissuseq malillugu misissuisoqarnissaanik periarfissap aamma § 6-itut siunnersuutigineqartumi nunanit allanit aningaasaliinerit nammineq kajumissuseq malillugu nalunaarutigineqanngitsut misissornissaannut Naalakkersuisut periarfissaqarnissaat siunertarineqarpoq. Tamatuma peqatigisaanik immikkut ittumik suliasaqarfiit suliniutillu malissarissut avataanni nunanit allanit aningaasaliinernut akuliussinnaanermut periarfissaq § 6-itut siunnersuutigineqartup tunniutissavaa.

§ 6-imut

Nunanit allanit aningaasaliinerit, § 4-mi ilaatinneqanngitsut, aamma § 5 malillugu nalunaarutigineqanngitsut, naammassineqarnerisa kingorna, aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu ukiut 5 tikillugit misissuisoqarnissaa Naalakkersuisut aalajangersinnaagaat, § 6-imi siunnersuutigineqarpoq.

§ 5-itut siunnersuutigineqartoq malillugu nunamit allamit aningaasaliineq nalunaarutigineqarsimanngippat aamma Naalakkersuisunit akuerineqarsimanngippat, Naalakkersuisut namminneerlutik misissuineramik, nunanit allanit aningaasaliinernik naammassineqarsimasunik imaluunniit naammassineqarsimanngitsunik ilaatitsisinnaasumik, aallartitsisinnaanerat, § 6-mut siunnersuutigineqartup kinguneraa. Aalajangersagassatut siunnersuutigineqartoq malillugu nunamit allamit aningaasaliinerup pineqartup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinera pillugu piviusumik pasisaassisoqarnera, misissuinermut apeqqutaanngilaq.

Aningaasaliinerup naammassineqarnerata kingorna ukiut 5 tikillugit nunamit allamit aningaasaliinerup nalunaarutigineqarsimanngitsup misissorneqarnissaa pillugu Naalakkersuisut aallartitsisinnaasasut, siunnersuutigineqarpoq. Taassuma ingerlatseqatigiiffinnut inatsimmi, Kalaallit Nunaannut atuutilersinneqartumi, § 23 h-mi malittarisassaq assigaa, tamatumalu kingorna ingerlatseqatigiiffinnut inatsiseqartitsineq malillugu inatsisinut naapertuuttumik taanna suliarineqarsimanersoq siunertaralugu, pissarsiamik nalunaarsuinerup kingorna ukiut 5 tikillugit qaangiunneranni misissuisoqarsinnaavoq.

§ 6-imut siunnersuut aamma § 12-itut siunnersuummut tassungalu oqaaseqaatinut ataqatigiissillugu isigineqassaaq, tamatumalu kingorna nunami allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu naliliinissamut paasissutissat attuumassuseqartut tamaasa, Naalakkersuisut piumasaqaatigisinnaavaat.

§ 7-imut

Qinnuteqaateqarnermut aamma nalunaaruteqarnermut, matumani qinnuteqaatit digitaliusumik tunniunneqarnissaat ilanngullugit, ingerlatseriaatsit pillugit Naalakkersuisut erseqqinnerusumik malittarisassanik aalajangersaasinnaasut, § 7-imi siunnersuutigineqarpoq.

Paasissutissanut tamanut atugassianut, aallaaviatigut qinnuteqaammi takuneqarsinnaasussanut malittarisassanik aalajangersaanissamut piginnaatitsissutip atorneqarnissaa naatsorsuutigineqarpoq. Ilaatigut paasissutissat tulluuttut pineqarsinnaapput:

1. Aningaasaliisartumit nunamit allameersumi immikkoortorta qarfimmilu nunamit allamit aningaasaliinissamik pilersaarute qarfigineqartumi imaluunniit naammassineqartumi piginnittuussuseq, matumani inaarutaasumik aningaasaliisoq aamma aningaasaatini peqataaneq pillugit paasissutissat ilanngullugit.
2. Nunamit allamit aningaasaliinerup nalingata missinga.
3. Aningaasaliisartumi nunamit allameersumi immikkoortorta qarfimmilu nunamit allamit aningaasaliinissamut pilersaarusi orfigineqartumi imaluunniit aningaasaliinermi naammassineqarsimasumi nioqqutissiat, sullissinerit aamma inuussutissarsiornermut tunngasumik nuussinerit.
4. Naalagaaffiit, aningaasaliisartup nunamit allamiut aamma suliffe qarfiup, tassani nunamit allamit aningaasaliineq pilersaarutigineqarluni imaluunniit naammassineqarluni, inuussutissarsiornermut tunngasumik nuussinernik attuumassuteqartunik sulia qarfigisai.
5. Paasissutissat, naalagaaffimmit atorneqarsinnaasut tunngavigalugit, aningaasaliinermi aningaasaliineq aamma taassuma aallaavia.
6. Ulloq, tassani nunamit allamit aningaasaliinerup naammassineqarfissaa eqqarsaatigineqartoq imaluunniit ulloq naammassineqarfia.

Inatsisartut inatsisaat manna malillugu imaluunniit tassannga malittarisassat aalajangersarneqartut malillugit, qinnuteqaatip tunniunneqarnissaa pillugu, Naalakkersuisut malittarisassanik erseqqinnerusunik aalajangersaasinnaanerat, aalajangersagassatut siunnersuutigineqartup aammattaaq kinguneraa. Tamanna assersuutigalugu immersugassaq elektroniskiusoq atorlugu pisinnaassaaq.

Sulianik suliarinnittarnerup qanoq ingerlanneqarnissaa Naalakkersuisut namminneq aalajangersassavaat. Tamanna malittarisassani aalajangersarneqassanngitsoq naatsorsuutigineqarpoq. Qinnuteqaatit imaluunniit suliat nalunaarutigineqartut piffissap naleqquttup iluani Naalakkersuisut suliarisassagaat naatsorsuutigineqarpoq. Sulianik suliarinnittarnermut piffissat atorneqartartut pillugit missingersuutit aamma sulianik suliarinnittarnermut ingerlatseriaatsit nalinginnaasut tamanut saqqummiunneqarsinnaapput.

§ 8-mut

Nr. 1-imut

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanngippat, nunamit allamit aningaasaliineq pillugu Naalakkersuisut akuersissuteqarsinnaasut imaluunniit akuersisinnaasut, *imm. 1-imi* oqaaseqatigiinni siullerni siunnersuutigineqarpoq.

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, aamma § 9 malillugu piumasaqaateqarnikkut navianartorsiortitsinerup pitsaaliorneqarnissaa periarfissaasimanngippat, nunamit allamit aningaasaliinerup itigartitsissutigineqarnissaa imaluunniit inerteqqutigineqarnissaa, Naalakkersuisut nalunaarutigisinnaagaat, imm. 1-imi oqaaseqatigiit aappaanni siunnersuutigineqarpoq.

Taanna siunnersuummi § 4 malillugu akuersissuteqarnissamik piumasaqaateqarnermi ilaatinneqarpat, oqaaseqatigiittut siunnersuutigineqartoq taanna malillugu aalajangiisoqarpat, nunamit allamit aningaasaliinerup naammassineqarnissaa inatsisinut naapertuussinnaanngilaq. Aningaasaliinernut, § 5 malillugu nalunaaruteqarnissaq pillugu siunnersuummi malittarisassanut ilaatinneqartunut, aamma suli naammassineqanngitsunut, tamanna aamma atuuppoq. Nunanit allanit aningaasaliinernut naammassineqareersunut siunnersuummi § 11-mut tassungalu oqaaseqaatinut innersuussisoqarpoq.

Inatsisartut inatsisaat manna aamma tassannga malittarisassat atulersinneqartut malillugit nunamit allamit aningaasaliinerup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata nalilersorneqarnerani, Kalaallit Nunaanni immikkoortorta qarfimmut, aningaasaliinermut tunngassuteqartumut, tunngatillugu, pissutsit paasissutissallu pissarsiarineqarsinnaasut eqqarsaatigineqassasut, matumani aalajangiinermut tunngaviit tuliiuttut ilanngullugit:

- 1) Suliniut attaveqaasersuutit pingaarutillit iluaniinnersoq imaluunniit taakkununnga sunniinersoq.
- 2) Kalaallit Nunaanni immikkoortorta qarfik paasissutissanik isertuussaasunik imaluunniit inummut paasissutissanik mianernartuusinnaasunik suliarinninnersoq imaluunniit atuisinnaatitaanersoq.
- 3) Kalaallit Nunaanni immikkoortorta qarfiup Kalaallit Nunaanni niuerfimmi inissisimaffia, matumani pitsaanerusumik taarserneqarsinnaaneranut periarfissat ilanngullugit.
- 4) Kalaallit Nunaanni immikkoortorta qarfik illersornissamut nioqqutissiormi ilaanersoq imaluunniit nioqqutissianik marloqiusamik atorneqarsinnaasunik imaluunniit teknikkikkut atortorissaarutini pingaaruteqartunik nioqqutissiormersoq.
- 5) Kalaallit Nunaanni immikkoortorta qarfik nioqqutissianik pingaaruteqartunik pilersuineramik suliaqarnersoq, matumani nukissiuutit aamma inuussutissiat isumannaatsuunissaat ilanngullugit.
- 6) Kalaallit Nunaanni immikkoortorta qarfik atortussiat aatsitassamit pisut aamma aatsitassat pingaarutillit pillugit suliaqarnersoq.

Aalajangiinnermut tunngaviit ilitersuutaasut uani pineqarput, taamaammallu pissutsit attuumassuteqartut allat aamma pingaartinneqarsinnaasussaapput.

Inatsisartut inatsisaat manna aamma tassannga malittarisassat atulersinneqartut malillugit nunamit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaanerata nalilersorneqarnerani, aningaasaliisartumut nunamit allameersumut tunngatillugu, pissutsit attuumassuteqartut aamma paasissutissat pissarsiarineqarsinnaasut eqqarsaatigineqassasut naatsorsuutigineqarpoq, matumani aalajangiinnermut tunngaviit tulliuttut ilanngullugit:

- 1) Aningaasaliisartuq nunamit allameersoq toqqaannartumik imaluunniit toqqaannangitsumik nunami allami naalakkersuisunit, nunani allani naalagaaffimmi sullissivinnit imaluunniit nunanit allanit sakkutooqarnermit naalakkersorneqarnerseq, matumani piginnittuuneq imaluunniit pingaarutilimmik aningaasalersuineq aqqutigalugu.
- 2) Aningaasaliisartuq nunamit allameersoq suliniutini, nunani ikinngutinneruni aamma iligisani isumannaatsuunissamut imaluunniit tamat toqqissisimatinneqarnissaanut sunniisuni peqataanersaq imaluunniit peqataasimanersaq.
- 3) Aningaasaliisartuq nunamit allameersoq inatsisinik unioqqutitsisunik imaluunniit pinerluttuliorluni suliniutini, Kalaallit Nunaata isumannaatsuunissaanut imaluunniit tamat toqqissisimatinneqarnissaanut pingaaruteqartuni, peqataanersaq imaluunniit atassuteqarnissaanut asuliunngitsumik aarlerinaateqarnerseq.
- 4) Aningaasaliisartup nunamit allameersup piaaraluni misissuinissamik malittarisassat avaqqunneqarnissaanik misiliiniarneranik patsisissaqarnerseq, assersuutigalugu peqquserluuteqarnermut assingusumik ingerlatseqatigiiffinnik pilersitsinikkut.

Aalajangiinissamut tunngavissatut siunnersuutigineqartut taamatuttaaq missingersuutaammata aamma tamakkiisuunngimmata maluginiarneqassaaq, tamannalu Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerup naliliiffigineqarnerata soorunami annertuummik paasilertoruminaatsuunermut atassuteqarneranik aamma navianartorsiortitsinnermut pissutsit ataatsimoortut piviusumik nalilersorneqarnissaannik kinguneqarnissaata tamatigut naatsorsuutigineqarnissaanik, tassani navianartorsiortitsinerup suugaluartulluunniit piviusunngoriataarnissaani kingunerineqarsinnaasut aamma pingaartinneqartussaanerannik pissuteqarpoq.

Nr. 2-mut

Naalakkersuisut imm. 1 malillugu aalajangiinissaasa tungaannut, nunamit allamit aningaasaliinerup naammassineqarnissaanut Naalakkersuisut utaqqiisaagallartumik inerteqquteqarsinnaasut, *imm. 2-mi* siunnersuutigineqarpoq.

Pisuni, taakkunani erniinnaartumik misissuinerup kingorna nunamit allamit aningaasaliinerup, imaluunniit allakkut nunamit allamit aningaasaliinerit eqqarsaatigineqartut Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermut atassuteqarsinnaanerit pasinartoqartoq, Naalakkersuisut paasippassuk, aalajangersagassatut siunnersuutigineqartup atorineqarnissaa naatsorsuutigineqarpoq.

Nunanit allamit aningaasaliineq siunnersuummi § 5-imi ilaatinneqartoq pineqarpat, siunnersuut malillugu akuersissuteqarnissamik imaluunniit inerteqquteqarnissamik aalajangiineq aalajangerneqartinnagu, aningaasaliineq inatsisinut naapertuuttumik naammassineqarsinnaasussaavoq. Pisuni taamaattuni aningaasaliinerup erseqqinnerusumik misissuiffigineqarnissaata naammassineqarnissaata aamma inaarutaasumik tamanna pillugu aalajangiinissap tungaannut, aningaasaliineq utaqqiisaagallartumik pitsaaliortariaqarpoq. Aningaasaliinerup § 5 malillugu nalunaarutigineqarsimanera imaluunniit nalunaarutigineqarsimannginnera, aalajangersagaq malillugu inerteqquteqarsinnaanerput pingaaruteqanngilaq.

Nunamit allamit aningaasaliineq, siunnersuummi § 4-imi ilaatinneqartoq pineqarpat, akuersissuteqaqqaarani aningaasaliinerup naammassineqarnissaa, § 4-imut akerliussaaq. Aamma pisumi taamaattumi aningaasaliinerup erseqqinnerusumik misissuiffigineqarnissaata naammassineqarnissaata aamma inaarutaasumik tamanna pillugu aalajangiinissap tungaannut, aningaasaliineq utaqqiisaagallartumik pitsaaliorneqarnissaa pisariaqartinneqarsinnaavoq. § 4 malillugu akuersissutip qinnuteqaatigineqarsimanera imaluunniit qinnuteqaatigineqarsimannginnera pingaaruteqanngilaq.

Imm. 2-tut siunnersuutigineqartoq malillugu suliap paasinarsarneqarnissaanut piumasaqaatit, utaqqiisaagallartumik pisinnaatitaanermik naammassinninnissamut atortup pineqarnera eqqarsaatigalugu isiginiarneqassaaq

Aalajangersagassatut siunnersuutigineqartoq malillugu utaqqiisaagallartumik inerteqquteqarnermik Naalakkersuisut aalajangiippata, tamatuma kingorna piaarnerpaamik nunamit allamit aningaasaliineq inatsisinut naapertuuttuunersoq pillugu Naalakkersuisut inaarutaasumik aalajangiissapput.

Imm. 3-mut

Nunamit allamit aningaasaliisup noqqaassuteqarnerata kingorna, imm. 1 malillugu utaqqiisaagallartumik akuersissummik Naalakkersuisut aalajangiisinnaasut, imm. 3-mi siunnersuutigineqarpoq. Aalajangersagaq malillugu Naalakkersuisut utaqqiisaagallartumik aalajangiinissamut pisussaaffeqanngisaannassapput, kisianni nunamit allamit aningaasaliisumit noqqaassuteqarnerup kingorna taamaaliornissaq toqqarsinnaavaat.

Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisutut nalilerneqarnissaanik, nunamit allamit aningaasaliinerup misissorneqarnera kinguneqarnavianngitsoq, aamma tamakkiisumik misissuinerup naammassineqarnissaanut atasumik suliamik suliarinninnermi piffissaq atorneqartoq naleqqutinngitsumik sivisuallaartutut nalilerneqarpat, aalajangersakkap atorneqarsinnaanissaa naatsorsuutigineqarpoq. Naliliinerup utaqqiisaagallartumik pissuseqarnerata malitsigisaanik, utaqqiisaagallartumik akuersissuteqarnissap akuerineqartariaqarneris pillugu noqqaassummut atatillugu Naalakkersuisut annertuumik missiliuisinnaapput.

Aalajangersagaq taanna malillugu aalajangiinerit utaqqiisaagallartuinnaammata, Naalakkersuisut inaarutaasumik akuersissummik nalunaaruteqarnissaat aningaasaliisut ilimagisinnaanngilaat. Taamaalilluni utaqqiisaagallartumik aalajangiinerit tatigalugit aningaasaliinerit pinerat, nunamit allamit aningasaasaliisup nammineq akisussaaffigissavaa.

§ 9-mut

Imm. 1-imut

Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata pitsaaliorneqarnissaa siunertaralugu, nunamit allamit aningaasaliinerup § 4-mi aamma § 5-imi ilaatinneqartup naammassineqarnissaanut piumasagaatit, Naalakkersuisunut isumaqatigiissutigineqartut, aningaasaliisartup nunamit allameersup eqqortissallugit neriorsuutigisinnaagai, imm. 1-imi siunnersuutigineqarpoq.

Akuersissut imaluunniit akuersineq, piumasagaatinik, Naalakkersuisunut isumaqatigiissutigineqartunik tungaveqartoq, ingerlatsinermi inatsiseqartitsineq malillugu aalajangiinertut pissuseqassaaq.

Nunanit allanit aningaasaliinissamut akuersissummik qinnuteqaatip imaluunniit nunamit allamit aningaasaliinerup akuerineqarnissaanut nalunaaruteqarnerup kingorna, qinnuteqaammi imaluunniit nalunaarutiginninnermi misissuinerup kingorna, Kalaallit Nunaata isumannaatsuutinneqarnissaanut imaluunniit tamat toqqissisimatinneqarnissaannut navianartorsiortitsisinnaasunik Naalakkersuisut

nassaarpata, kisianni taakku aningaasaliinerup naammassineqarnissaanut piumasaqaatinik erseqqinnerusunik piumasaqaateqarnikkut pitsaaliorneqarsinnaasut nalilerneqarpat, aalajangersagaq atorneqassaaq. Pisuni taamaattuni piumasaqaatit taamaattut, aningaasaliisup nunamit allameersup naammassiumallugit oqaatigisai, Naalakkersuisut akuerisinnaavaat. Piumasaqaatit, aningaasaqarnermut tunngassuteqartut amerlanertigut pineqarsinnaapput, assersuutigalugu aningaasaliisup piginnittutut piginneqataasuusaasa killilerneqarnerat, aqutsinermut tunngassuteqartumik pissusillit, assersuutigalugu aningaasaliisup suliffeqarfimmi aqutsisuni peqataaneranut killiliinerit, imaluunniit piumasaqaatit suliassa qarfiit ilaanni, assersuutigalugu teknikkikkut atortorisarutit pingaarutillit ineriartortinneqarneranni, aningaasaliisup paasisimasaqassuseqarnissaata killilerneqarnissaannut sammitinneqartut. Ingerlatsinissamut- aamma pisiortorfinnut isumaqatigiissutinut atatillugu, taamatuttaaq taassuma taamaattoqarpat suliffeqarfimmut pilersuisuanut piumasaqaatinik aalajangersaasoqarsinnaassaaq.

Imm. 2-mut

Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinissaata pitsaaliorneqarnissaa siunertaralugu, nunamit allamit aningaasaliinerup § 4-mi aamma § 5-mi ilaatinneqartumut akuersissuteqarnissamut imaluunniit akuerinninnissamut piumasaqaatit piumasaqaatitut Naalakkersuisut aalajangersarsinnaagaat, imm. 2-mi siunnersuutigineqarpoq.

Imm. 1-imut akerliusumik, nunamit allamit aningaasaliinerup akuersissutigineqarnissaanut imaluunniit akuerineqarnissaanut piumasaqaatitut, imm. 2-mi aalajangersagassatut siunnersuutigineqartup kinguneraa. Ingerlatsinissamut- aamma pisiortorfinnut isumaqatigiissutinut atatillugu, taamatuttaaq taassuma taamaattoqarpat suliffeqarfimmut pilersuisuanut piumasaqaatinik aalajangersaasoqarsinnaassaaq.

Imm. 3-mut

Nunamit allamit aningaasaliineq attanneqartillugu, imm. 1 aamma 2 malillugit piumasaqaatit eqqortinneqassasut, imm. 3-mi siunnersuutigineqarpoq. Aningaasaliisoq nunamit allameersoq, piumasaqaatit isumaqatigiissutigineqartut ukiup ingerlanerani qanoq ilillutik eqqortinneqarsimanerat pillugit ukiumoortumik nalunaarusiamik nassiussisassaaq. Nalunaarusiami paasissutissat eqqortuunerat pillugit kukkunersiuisumit, Kukkunersiuisut aamma kukkunersiuinermik suliffeqarfiit akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, aamma aningaasaliisumit nunamit allameersumit attuumassuteqannginnerminik uppersaasumik, nalunaarummik nalunaarusiaq ilaqartinneqassaaq.

Nunanit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermik kinguneqannginnissaata pitsaaliorneqarnissaanut, piumasaqaatit isumaqatigiissutigineqartut eqqortinneqarnissaannut pingaaruteqarpoq. Taamaalluni nalunaarummi piumasaqaatit naammassineqarsimanerisa ilisimatitsissutigineqarnerat aalajangersagassatut siunnersuutigineqartuq malillugu naammanngilaq, kisianni qanoq tamanna piviusumik pisimanersoq paasissutissiissutigineqassaaq. Paasissutissat eqqortuunerat qulakkeerniarlugu, aalajangersagassatut siunnersuutigineqartuq malillugu kukkunersiuisumit, kukkunersiuisut inatsit malillugu akuerisaasumit, nalunaarummik nalunaarusiaq ilaqartinneqassaaq.

§ 10-mut

Ilaatigut pisuni tulluuttuni, aalajangiineq Naalakkersuisut allanngortissinnaagaat imaluunniit utertissinnaagaat, § 10-mi siunnersuutigineqarpoq:

- 1) Aalajangiineq paasissutissat eqqunngitsunik imaluunniit paatsiveerussaataasut tunngavigalugit aalajangerneqarsimappat.
- 2) § 9 malillugu piumasaqaatinik eqqortitsinnginneq imaluunniit piumasaqaatit pillugit nalunaarusiornissamik eqqortitsinnginneq.
- 3) § 5 malillugu Kalaallit Nunaanni immikkoortortami piginnittutut piginneqataassutsinik imaluunniit taasisinnaatitaanernik toqqaannartumik imaluunniit toqqaannanngitsumik peqarnerup imaluunniit pissaaneqarfeqarnerup imaluunniit aalajangiinerni aalajangiisuusumik pissaaneqarnerup annertusineqarnerani akuersissummik peqarnissaq pillugu nutaamik qinnuteqarnissamut pisussaaffiup eqqortinneqannginnera.
- 4) § 12-imut akerliu sumik aningaasaliisartuq nunanit allaneersoq paasissutissanik Naalakkersuisunut tunniussinngilaq.
- 5) Pissutsit allanngornerat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut ilungersunartumik navianartorsiortinneqarnerannik kinguneqartut.

Nr. 1-imiit 5 ilanngullugu allattuineq tamakkiisuunngilaq. Utertitsisarneq pillugu ingerlatsinermut inatsiseqartitsinermi malittarisassat atuutissammata, tassunga atatillugu maluginiarneqassaaq.

Paasissutissat eqqunngitsut tunngavigalugit akuersissut tunniunneqarsimappat, imaluunniit oqartussaasut paatsoortinneqarnissat siunertaralugu qinnuteqartup piaaraluni paasissutissat nipangiussimappagit, aalajangiineq assersuutigalugu allanngortinneqarsinnaavoq imaluunniit utertinneqarsinnaalluni.

Suliami akuusut piumasaqaatit piumasaqaatigineqartut eqqortinngippatigit, imaluunniit § 9, imm. 3-tut siunnersuutigineqartoq malillugu piumasaqaatit isumaqatigiissutigineqartoq qanoq ilillutik eqqortinneqarsimanerat pillugit pisussaaffiusumik ukiumoortumik nalunaarusiamik nassiussinngippata, taamatuttaaq aalajangiineq allanngortinneqarsinnaassaaq imaluunniit utertinneqarsinnaassaaq.

Aningaasaliisoq nunamit allameersoq agguagarsianik, Kalaallit Nunaanni immikkoortortaarfimmi, nunamit allamit aningaasaliinerit, § 3, litra b-tut siunnersuutigineqartumi killissarititaasunik, taama malittariillutik, pingajorarterummik, 50 pct.-imik, pingajorarterutininik marlunnik imaluunniit 100 pct.-imik qaffaanermik kinguneqartut, kingusinnerusukkut suliffeqarfiup aqunneqarnerani pingaarutilimmik sunniuteqartut pissarsiarineqartut, pillugit akuersissummik qinnuteqanngippat, aalajangiineq aammattaaq allanngortinneqarsinnaassaaq imaluunniit utertinneqarsinnaassaaq.

Pissutsit allanngorneri allat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermik kinguneqartut pippata, aalajangiineq aamma allanngortinneqarsinnaassaaq imaluunniit utertinneqarsinnaassaaq.

§ 11-imut

Aningaasaliinermut akuersissuteqarneq imaluunniit akuersineq pillugu aalajangiineq, § 10 malillugu utertinneqarsimappat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, imaluunniit nunamit allamit aningaasaliineq § 8 malillugu itigartitsissuteqarsimanermut imaluunniit inerteqquteqarsimanermut akerliusumik naammassineqarsimappat, nunamit allamit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaasut, § 11-imi siunnersuutigineqarpoq.

Nunamit allamit aningaasaliineq, akuersissummik imaluunniit akuersinermik akerliusumik attanneqartoq, imaluunniit aningaasaliineq § 8 malillugu itigartitsissummut imaluunniit inerteqquteqarnermut akerliusumik naammassineqarsimappat, atorunnaarsitsisoqarnissaa pillugu Naalakkersuisut naalakkiuteqarsinnaanerannik aalajangersagassatut siunnersuutigineqartoq periarfissaliissummik tunisivoq.

Imm. 2-mut

Aningaasaliisoq nunami allameersoq § 4-mut akerliusumik akuersissummik qinnuteqarsimanngippat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, nunamit allamit aningaasaliinerup

atorunnaarsinneqarnissaa pillugu Naalakkersuisut naalakkiuteqarsinnaasut, imm. 2-mi siunnersuutigineqarpoq.

Aningaasaliineq akuersisummik pisariaqartinneqartumik peqarani, siunnersuummi § 4-mut akerliusumik naammassineqarsimappat, nunamit allamit aningaasaliinerup atorunnaarsinneqarnissaa pillugu naalakkiuteqarnissamik aalajangersagassatut siunnersuutigineqartup Naalakkersuisut periarfissaliisummik tunivaat. Pisuni taamaattuni Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerit ilungersunartut pineqarsinnaapput, taamaammallu atorunnaarsitsineq pisariaqarsinnaavoq.

Imm. 3-mut

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, nunamit allamit aningaasaliinerup § 6-imi ilaatinneqartup atorunnaarsinneqarnissaa pillugu Naalakkersuisut naalakkiuteqarsinnaasut, imm. 3-mi siunnersuutigineqarpoq.

Pisuni, taakkunani Naalakkersuisut nammineerlutik § 6-itut siunnersuutigineqartoq malillugu misissuineramik aallartitsisimaneranni, aamma nunamit allamit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaalluni, aalajangersagassatut siunnersuutigineqartoq atuutissaaq.

§ 12-imut

Imm. 1-imut

Nunanit allanit aningaasaliinissatut eqqarsaatigineqartut imaluunniit aningaasaliinerit naammassineqartut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerisa imaluunniit Inatsisartut inatsisaat manna malillugu apeqqutit allat nalilersorneqarnissaannut pisariaqartinneqartunik, aningaasaliisumit nunamit allameersumit paasissutissanik tamanik Naalakkersuisut piumasagaateqarsinnaasut, imm. 1-imi oqaaseqatigiinni siullerni siunnersuutigineqarpoq.

Aalajangersagassatut siunnersuutigineqartoq atituumik atuuffissaqarpoq aamma taamaammat § 4 malillugu qinnuteqaatinut, § 5 malillugu nalunaarutiginninnernut aamma § 6 malillugu misissuineranut atuutissalluni. Pisuni, taakkunani nunamit allamit aningaasaliineq § 4-mi ilaatinneqarnersoq pillugu misissuisoqarnerani, aamma tassani akuersisummik qinnuteqartoqarsimannginnerani, imaluunniit “nunamit allamit aningaasaliineq” pineqarnersoq pillugu misissuisoqarnerani, aalajangersagaq aammattaaq atuutissaaq. Pisunit, taakkunani § 19,

imm. 2-tut siunnersuutigineqartoq malillugu akuersissummik utertitsisoqassanersoq pillugu misissuisoqarnerani, aalajangersagaq aammattaaq atuutissaaq.

Nunamit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaanut sunniisinnaanera pillugu paasissutissiinissamik piumasaqaatit assigiinngitsorpassuusinnaapput, aamma taamaammat paasissutissat tamarluinnaasa, aningaasaliinerup piviusup Kalaallit Nunaata isumannaatsuunissaanut imaluunniit tamat eqqissisimatinneqarnissaannut navianartorsiortitsisinnaanera imaluunniit Inatsisartut inatsisaat manna malillugu apeqqutit allat nalilerneqarnissaannut pisariaqartinneqartut, siuningaani erseqqissarneqarnissaat taamaammat periarfissaqarnaviannngilaq. Taamaammat paasissutissanik attuumassuteqartunik tamanik Naalakkersuisut piumasaqaateqarsinnaanerit siunnersuutigineqarpoq.

“Inatsisartut inatsisaat manna malillugu apeqqutit allat” oqaasertaliorneqarnerat atituumik paasineqassaaq aamma pisut, taakkunani “nunanit allamit aningaasaliineq” pineqarneris, imaluunniit aningasaliineq suliaasaqarfinni suliniutinilu immikkut ittumik malissarissusillit iluaaniinnersoq tassani ilaatigut pineqarput.

Paasissutissat eqqortuunerat pillugit kukkunersuiisumit, Kukkunersuiisut aamma kukkunersuiinermik suliffeqarfiit akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, nalunaarummik nalunaarusiaq ilaqartinneqassasoq, Naalakkersuisut piumasaqaatigisinnaagaat, imm. 2-mi siunnersuutigineqarpoq. Aningaasartuut nunamit allamit aningaasaliisumit aningaasartuutigineqassaaq. Inuk, imm. 2 malillugu nalunaarummik tunniussisoq, aningaasaliisumit nunamit allameersumit attuumassuteqannginnini uppersarsassavaa.

Aalajangersagaq malillugu kukkunersuiisoq paasissutissaat suussusaannik tamanik, uppersarsarneqarsinnaasunik taamaallaat tunniussisussaassaaq. Paasissutissanut, aningaasaliisumit nunamit allameersumit tunniunneqartunut aalajangersagassatut siunnersuutigineqartoq taamaallaat atuutissaaq, tassami pisuni, imm. 2 malillugu Kalaallit Nunaanni immikkoortortaqaqarfinnit paasissutissanik pissarsiniartoqartillugu, kukkunersuiisup nalunaaruteqarnissaa pisariaqartutut nalilerneqanngimmat.

Pissutsit pillugit paasissutissat, Kalaallit Nunaata isumannaatsuutinnissaanut imaluunniit tamat toqqissisimatinneqarnissaannut navianartorsiortitsisinnaanarit pillugit naliliinissamut annertuumik pingaarutillit pineqarnerannik, Naalakkersuisut piviusumik naliliisimanerat, kukkunersuiisumit nalunaarut pillugu piumasaammi saniatigut piumasaqaataavoq. Kukkunersuiisumit nalunaarummut taamaattumut aningaasartuutit aningaasaliisartumit nunamit allameersumit

anigaasartuutigineqassapput. Aalajangersagaq malillugu nalunaaruteqarnermi, kukkunersiuisup anigaasaliisartumut nunamit allameersumut pineqartumut attuumassuteqannginnini, tamatuma peqatigisaanik uppersarsassavaa.

Aalajangersagassatut siunnersuutigineqartoq malillugu kukkunersiuisoq, kukkunersiuisut pillugit inatsit, Kalaallit Nunaannut atuutilersinneqarsimasoq, malillugu akuerisaasoq, pineqassaaq. Taamaalilluni ilaatigut kalaallit, qallunaat imaluunniit kukkunersiuisut nunanit allaneersut, kukkunersiuisut pillugit inatsit malillugu nunami maani sulianik suliarinninnissamut akuerisaasut pineqarsinnaapput.

Paasissutissat piumasarineqartut assersuutigalugu Naalakkersuisunut tunniunneqanngippata imaluunniit kukkunersiuisumit akuerisaasumit uppersarsarneqanngippata, qinnuteqaat imaluunniit nalunaarutiginninneq paasissutissat pigineqartut tunngavigalugit suliarineqarsinnaanngitsaq, Naalakkersuisut qinnuteqartumut imaluunniit nalunaarutiginnittumut nalunaarutigisinnaavaat.

Imm. 2-mut

Akuusuni attuumassuteqartuni Naalakkersuisuisut paasissutissanik aammattaaq pissarsiniarsinnaasut, matumani anigaasaliisartumit nunamit allameersumit paasissutissat uppersarsarneqarnissaat ilaatigut siunertaralugu Kalaallit Nunaanni immikkoortortaqaarfimmit pissarsiniarsinnaasut, imaluunniit Kalaallit Nunaanni immikkoortortaqaarfik pillugu paasissutissanik pissarsiniarsinnaasut, matumani aqutsisut ilusaat aamma suliaasaqarfiit ingerlatsiffiusut ilanngullugit, imm. 2-mi siunnersuutigineqarpoq.

Paasissutissat allat, Naalakkersuisut tigusimasaat imaluunniit pissarsiarisimasaat, qinnuteqaatip imaluunniit nalunaarutiginninnerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerannik naliliinermi ilaasinnaanerat naatsorsuutigineqarpoq.

Tassani assersuutigalugu paasissutissat, Naalakkersuisut noqqaassuteqarnerup kingorna, sulianik suliarinninnerminnut atatillugu Kalaallit Nunaanni oqartussaasut attuumassuteqartut tusarniaavigineqarnerisa kingorna tigusaat aamma paasissutissat nunanit allaneersut, matumani ilaatigut Politiit Paasiniaasartui (PET) aamma Illersornissaqarfiup Paasiniaasartui (FE) ilanngullugit. Inatsisartut inatsisaat manna malillugu sulianik suliarinninnermut atasumik ilaatigut paasiniaasartunit paasissutissanik pissarsinissaat aamma avitseqatigiissutigisinnaagaat, taamaalilluni naatsorsuutigineqarpoq. Paasissutissat tusarfinnit ammasuneersut aamma naliliinermi ilaatinneqarsinnaassapput.

Suliami, pisortani oqartussaasutut suliami aalajangiinermik aalajangiitinnani paasissutissat attuumassuteqartut piviusut aamma inatsisilerinnermut tunngasut pissarsiarineqarnissaannik tunngavimmut naapertuuttumik, Naalakkersuisut namminneerlutik misissuinnermik suliaqarsinnaassapput, assersuutigalugu aningaasaliisartumut imaluunniit nunamit allamit aningaasaliinerup tunuliaqutaani piginnittuni allani tunisassianik dual-use-iusunik avammut tunisinissamut siusinnerusukkut itigartitsissuteqarsimanersoq pillugu misissuinnermikkut. Aammattaaq piginnittuussutsit pillugit nalunaarsuiffinni avataaniittuni nassaassaasuni Naalakkersuisut misissuinnermik suliaqarsinnaassapput, ilaatigut nunarsuarmi tamarmi ingerlatseqatigiiffiit taakku piginnittui pillugit nalunaarsuiffinni namminerisamik pigineqartuni. Tamatuma saniatigut Naalakkersuisut aallaqqaataasumik misissuinnerannut atatillugu, oqartussaasut allat tusarniaaffigineqarnerannik suliaqarneq pisariaqartinneqassaaq, matumani qallunaat oqartussaasui ilanngullugit. Oqartussaasut attuumassuteqartut ingammik tassaassapput Politiit Paasiniaasartui (PET) aamma Illersornissaqarfiup Paasiniaasartui (FE) aamma naalakkersuisoqarfik oqartussaasuusoq pineqartoq, kisianni suliap qanoq issusaa aamma pissutsit piviusut tunngavigalugit ataatsimut naliliineq apeqqutaatinneqassaaq.

Imm. 3-mut

Inatsisartut inatsisaat manna malillugu suliamik suliarinninnermut atugassanik, nunat allat oqartussaasuunik paasissutissanik avitseqateqarsinnaaneq pillugu Naalakkersuisut malittarisassanik aalajangersaasinnaasut, imm. 3-mi siunnersuutigineqarpoq.

Piginnaatitsineq siunnersuutigineqartoq paasissutissat attuumassuteqartut avitseqatigiissutigineqarnissaat pillugit malittarissanik erseqqinnerusunik aalajangersaasinnaanermut atorneqarsinnaassapput, matumani nunani allani oqartussaasuunik paasissutissanik isertuussaasuunik avitseqatigiissuteqarneq ilanngullugu, matumani siunnersuut malillugu Naalakkersuisut suliamik suliarinninnerannut pisariaqartinneqarpat, qallunaat nunaanni savalimmiunilu oqartussaasuunik avitseqatiginninneq ilanngullugu.

§ 13-imut

Imm. 1-imut

Nunanit allanit aningaasaliinernik Inatsisartut inatsisaanni matumani ilaatinneqartunik Naalakkersuisut nakkutilliissasut aamma tamanna pillugu malittarisassanik erseqqinnerusunik aalajangersaasinnaasut, imm. 1-mi siunnersuutigineqarpoq.

Assersuutigalugu akuersissummik qinnuteqarnermi aamma akuerineqarnissamik noqqaassuteqarnermi paasissutissat eqqortuunerannik, piumasaqaatit isumaqatigiissutigineqartut

imaluunniit akuersissutini imaluunniit akuersissuteqarnerni aalajangersarneqartut eqqortinneqarnerannik aamma nalinginnaasumik nunanit allanit aningaasaliinerni, taakkunani akuersissummik qinnuteqartoqarsimanani imaluunniit akuerineqarnissamik noqqaassuteqarsimanani, aalajangersagassatut siunnersuutigineqartoq malillugu Naalakkersuisut nakkutilliisinnaassapput.

Nunanit allanit aningaasaliinernik tamanik ingerlaavartumik Naalakkersuisut nakkutiginninnissaat naatsorsuutigineqanngilaq, kisianni assersuutigalugu paasiniaasartunit paasissutissat tunngavigalugit imaluunniit siunnersuummi § 4-mut akerliusumik akuersissuteqaqqaarani nunamit allamit aningaasaliisimaneq naammassineqarsimasoq pillugu tusagassiuutini paasissutissiissutinit ilimasutsinneqalerunik, nakkutilliinissamut imaluunniit taamaaliortoqassappat akuliunnissamut Naalakkersuisut periarfissaqarput. Assersuutigalugu nunanit allamit aningaasaliinerup siunnersuummi § 5-imi ilaatinneqartup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pasitsaanneqarpat, Naalakkersuisut taamaaliorsinnaapput.

Imm. 2-mut

Tamanna pisariaqartinneqartutut nalilerneqarpat, Inatsisartut inatsisaat manna malillugu imaluunniit tassannga malittarisassat aalajangersarneqartut malillugit, Naalakkersuisut aamma oqartussaasunit allanit sinniisut nakkutilliinermut- aamma nakkutiginninnermut atasumik suliaqarnerminnut atugassaminnik, pisariaqartumik qanoq iliorsinnaanermut uppersaateqarlutik aamma eqqartuussivimmit aalajangiinertaqanngitsumik inuussutissarsiornermut tunngasumik ininut aamma assartuutitut isersinnaatitaassasut, imm. 2-mi siunnersuutigineqarpoq.

Kalaallit Nunaanni immikkoortortami, nunamit allamit aningaasaliinermi sammineqartumi, nakkutilliinermi aalajangersagassatut siunnersuutigineqartup atorneqarnissaa eqqarsaatigineqarpoq.

Kalaallit Nunaata isumannaatsuunissaanut aamma tamat toqqissisimatinneqarnissaannut, aamma paasissutissat allatut iliornikkut pissarsiarineqarsinnaasimanninnerani, aalajangersagassatut siunnersuutigineqartup taamaallaat atorneqarnissaa naatsorsuutigineqarpoq.

Piumasaqaatit aalajangersarneqartut, akuersissuteqarnermut piumasaqaataasimasut, eqqortinneqarnerisut assersuutigalugu aalajangersarniarlugit, nakkutilliartornermi siunertaasinnaavoq.

Assersuutigalugu isumannaatsuunissamut ingerlatseriaatsit aamma aaqqissuinerit, paasissutissat ilaasa misikkarissut imaluunniit systemit aningaasaliisumit nunamit allameersumit tikinneqarsinnaanngitsuunissaasa malinneqarsimanerata qulakkeerneqarsimanerannik nakkutilliineq

pineqarsinnaavoq. Oqartussaasut allat suliassaqarfinnut taakkununga immikkut ittumik paasisimasallit, assersuutigalugu paasiniaasartut, tamanna naleqquttut nalilernerqarpat, nakkutilliinermi peqataasinnaassapput. Nunamit allamit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinersoq § 6 malillugu misissuinnermut atatillugu assersuutigalugu nakkutilliineq aamma pisinnaasussaavoq.

Inatsisartut inatsisaata malillugu suliassat suliarineqarnissaannut tamanna pisariaqartinneqarpat, Nakkutilliinernut atatillugu oqartussaasunit allanit sinniisunik Naalakkersuisut ilaqarsinnaapput, matumani paasiniaasartut ilanngullugit. Oqartussaasunit allanit sinniisut taamaalillutik Naalakkersuisunik ikiuiniarlutik, nakkutilliiartornerni peqataasinnaapput

Naalakkersuisut eqqartuussivimmit aalajangiinermik peqaqqaratik suliffeqarfinnut isersinnaatitaanerit, inatsimmi tunngaviusumi § 72-imi oqaaseqatigiit aappannit immikkut ittumik iliorneruvoq.

Ininut, inuussutissarsiummik ingerlatsiffiusunut taamaallaat Naalakkersuisut isersinnaatitaassapput aamma taamaammat namminerisamik najugaqarfinnuunngitsoq. Pisuni, taakkunani suliffeqarfiup inuussutissarsiornermik ingerlatsinerminut inaataa namminerisamik angerlarsimaffimmiippat, taamaattoq aalajangersakkamut massumunga naapertuuttumik Naalakkersuisut isersinnaasussaapput.

Eqqartuussivimmit aalajangiinermik peqaqqaaratik Naalakkersuisut inersinnaanermut periarfissaat taamaallaat nakkutilliinissamut tunngasumik atorsinnaannaassaaq. Inatsisiliorneq alla imaluunniit pinerluttulerinermik inatsit malillugu unioqqutitsinermik pillaatissiissutaasinnaasumik pissutissalimmik pasitsaassisoqarpat, suliaq eqqartuussisarnermik inatsimmi pinerluttulerinermi inatsiseqartitsineq pillugu malittarisassat malillugit suliarineqartussaassaaq. Taamaammat suliaq politiinit suliarineqartussaassaaq.

Imm. 3-mut

Immikkoortortaqarfiit aamma aningaasaliisartut nunanit allameersut imm. 2 malillugu nakkutilliinerup- aamma nakkutiginninnerup sunniuteqarluartumik naammassineqarnissaanut suliarineqarnissaanut pisariaqartinneqartumik ikiutissasut, imm. 3-mi siunnersuutigineqarpoq, matumani paasisutissat attuumassuteqartut tunniunnerisigut, ininut inuussutissarsiornermut tunngassuteqartunut aamma assartuutitut isersinnaatitsinikkut aamma nakkutilliiartornerni ikiuunnikkut.

Naalakkersuisut paasissutissanik taakkuninnga noqqaassutigineqartunik tunineqarsinnaanissaat kiisalu ininut assartuutinullu inuussutissarsiornermut tunngassuteqartunut, Naalakkersuisut nakkutilliinerannut pisariaqartinneqartut naatsorsuutigineqartunut isersinnaatitaanissaat, ikiuunnerup kinguneraa. Namminerisamik pigisat assersuutigalugu aqutsisunit imaluunniit sulisunit pigineqartut, aalajangersakkami ilaatinneqanngillat.

§ 14-imut

Tamanna naleqquttutut isigineqartillugu, Inatsisartut inatsisaat malillugu nakkutilliinerup aallartinneqarnera imaluunniit aallartinneqarsimanera, nakkutilliinermi inerniliussat kiisalu Inatsisartut inatsisaat aamma tassannga malittarisassat atulersinneqartut malillugit aalajangiinerit, Naalakkersuisut tamanut saqqummiussinnaagaat, § 14-imi siunnersuutigineqarpoq.

Naalakkersuisut nakkutilliinermik suliaq aallartissimagaat, imaappoq nakkutilliineq ingerlasoq, Naalakkersuisut saqqummiussinnaagaat, aalajangersagassatut siunnersuutigineqartup ilaatigut kinguneraa. Taamaallutik aalajangiinissaq sulii aalajangiiffigineqartinnagu, nakkutilliineq aallartinneqarsimasoq pillugu Naalakkersuisut tamanut ilisimatitsisinnaapput. Pisoqarsinnaavoq, taakkunani Naalakkersuisut nakkutilliinermik aallartitsisimanerat pillugu paasissutissat annertuumik tamanit soqutigineqarlutik. Aningaasaliisartup nunamit allameersup paasissutissanik piumasagaatigineqartunik tunniunniussinisaanut imaluunniit isumaqatigiissutigineqartut imaluunniit piumasagaatit aalajangersarneqartut pillugit Naalakkersuisut naalakkiutaasa malinneqarnissaannut, tamanut saqqummiussinermi aarlerinaat aammattaaq ilapittuutaasinnaavoq.

Aalajangersagassatut siunnersuutigineqartoq malillugu, aningaasaliisartup nunamit allameersup aqqanik aamma taamaattumik peqarpat CVR-normuanik kiisalu taamaattoqarsimappat unioqqutitsinerup ilimagineqartup suussusaanik, Naalakkersuisut nalunaarutaat imaqarsinnaavoq. Ataqtigiissaagaasumik tamanut saqqummiussineq pineqanngilaq, kisiannili tassani suliani ataasiakkaani tamani, namminerisamik imaluunniit pisortat soqutigissaannik, tassunga paasissutissanut tunngassuteqartumut innimigisassat pillugit, Naalakkersuisut nalilersueqqissaarnerannik aqqissuussineq pineqarluni.

Aalajangersagassatut siunnersuutigineqartoq malillugu, nakkutilliinermi inerniliussaq tamaat imaluunniit ilaannaa Naalakkersuisut saqqummiussinnaavaat. Aningaasaliisartup nunamit allameersup aqqanik aamma taamaattoqarpat CVR-normuanik kiisalu unioqqutitsinerup suussusaa aamma nakkutilliinermut uiggiullu Naalakkersut aalajangiinera tamakkerlugu imaluunniit ilaannaa, nakkutilliinerup inerniliussaata tamanut saqqummiunneqarnera imaqassaaq. Pisuni, taakkuni immikkoortortaqarfimmik nakkutilliineq aallartinneqarsimasoq imaluunniit aallartinneqartussaasoq

Naalakkersuisut tamanut saqqummiussisimaneranni, Naalakkersuisut nakkutilliinerup inerniliusnaanik aamma tamanut saqqummiussinisaat naatsorsuutigineqarpoq. Taamaattoq nakkutilliinermi inerniliussap tamanut saqqummiunneqarnerani, Naalakkersuisut nakkutilliinermik aallartitsisimanerata siuningaani saqqummiunneqarsimanissaa apeqqutaanngilaq.

Aalajangersagassatut siunnersuutigineqartoq malillugu tamanut saqqummiussinermi, nunanit allanit aningaasaliinerit pillugit akuersissuteqarnissamik imaluunniit nalunaaruteqarnermi, paasissutissat Kalaallit Nunaata isumannaatsuunissaanut imaluunniit tamat toqqissisimatinneqarnissaannut tunngassuteqartut ilaatinneqanngillat, kisianni taamaallaat tulliusumik nakkutilliineq pillugu paasissutissat ilaatinneqassallutik.

Aalajangersagassatut siunnersuutigineqartoq malillugu, tamanut saqqummiussineq qanoq ililluni pissanersoq, Naalakkersuisut aalajangissagaat naatsorsuutigineqarpoq.

Tamanna naleqquttutut isigineqartillugu, aalajangersagassatut siunnersuutigineqartoq malillugu tamanut saqqummiussineq pisinnaavoq. Tamanut saqqummiussineq pinerluttoqarsimaneranik paasiniaanermut imaluunniit misissuinnermut, imaluunniit tamanut saqqummiussineq aningaasaliisartumut nunamit allammeersumut, imaluunniit Kalaallit Nunaanni immikkoortortaqaarfimmuut naleqqutinngitsumik annertuumik ajoqusiisussatut nalilerneqarpat, tamanut saqqummiussineq pissanngitsoq, tamatuma ilaatigut kinguneraa.

§ 15-imut

Aningaasartuutitut Inatsisartut inatsisaat manna aamma tassannga malittarisassat atulersinneqartut malitsigisaanik oqartussaasut suliarinninnerannut atassuteqartut pillugit akiliummik akiliisoqarnissaa pillugu Naalakkersuisut malittarisassanik aalajangersaasinnaasut, § 15-imi siunnersuutigineqarpoq.

Aalajangersagassatut siunnersuutigineqartoq malillugu Naalakkersuisut allaffissornerannut Naalakkersuisut akiliutit pillugit malittarisassanik aalajangersaasinnaanermut periarfissaqarput. Akiliutitigut aningaaliineq pillugu malittarisassanik aalajangersaasinnaanermut periarfissaq, akuersissuteqarnissamut- aamma nalunaaruteqarnermut suliat suussusaannut tamanut, Naalakkersuisut inatsit manna aamma tassannga malittarisassat atuutilersinneqartut malillugit suliarisaannut, atuutissaaq. Aalajangersagassatut siunnersuutigineqartumi assersuutigalugu sulianik suliarinninnermut, nakkutilliinnermut oqartussaasut suliarinninnerinut allanut, suliamut tunngatillugu angalanernut, avataanit siunnersortitut il.il. aningaasartuutit ilaatinneqarput.

§ 16-imut

Imm. 1-imut

Inatsisartut inatsisaat manna malillugu iliuserisassat naammassineqarnissaannut tamanna pisariaqartinneqarpat, Naalakkersuisut namminerisamik pigisanik pinngitsaaliisummik taarsiissutitalimmik pigisanik piginnikkunnaarsitsineq aallartissinnaagaat siunnersuutigineqarpoq.

Inatsisartut inatsisaat manna malillugu iliuitsit naammassineqarnerat pinngitsaaliisummik taarsiissutitalimmik pigisanik piginnikkunnaarsitsinertut akuliunneruppata, aalajangersagaq atuutissaaq. Pissutsit assigiinngitsut malillugit assersuutigalugu nunanit allamit aningaasaliineq pillugu atorunnaarsitsinissamik naalakkiuteqarneq pillugu § 11 malillugu iliuseqarnermi tamanna pisinnaavoq.

Iliuitsit taamaattut naammassineqarsinnaanerat, naak inatsimmi tunngaviusumi § 73 malillugu pinngitsaaliisummik taarsiissutitalimmik pigisanik piginnikkunnaarsitsinermik kinguneqartussaagaluartut, aalajangersagassatut siunnersuutigineqartup qulakkeerpaa.

Tunngaviusumit inatsimmit isigalugu pinngitsaaliisummik taarsiissutitalimmik pigisanik piginnikkunnaartitsisoqassappat, pingaarnertut piumasaqaatit marluk naammassineqaaqqaassasut, inatsimmi tunngaviusumi § 73, imm. 1-ip malitsigaa. Siullertut akuliunneq “pigisanut”, inatsimmi tunngaviusumi § 73-imi illersorneqartunut, sammitinneqassaaq. Aappaattut akuliunneq pinngitsaaliisummik taarsiissutitalimmik pigisanik piginnikkunnaartitsinerussaaq (uani tunniussineq pineqassaaq).

Inatsimmit tunngaviusumit isigalugu pinngitsaaliisummik taarsiissutitalimmik pigisanik piginnikkunnaarsitsinertut pissusilimmik akuliuttoqarpat, akuliunnerup inatsimmut tunngaviusumut naapertuunnissaanut piumasaqaatit pingasut naammassineqarsimassapput. Akuliunneq inuiaqatigiinnit piumasaqaataassaaq, inatsit malillugu suliarineqassalluni, aamma piginnittumut pineqartumut tamakkiisumik taarsiissut tunniunneqassaaq. Inuiaqatigiinniit akuliunnerup piumasaqaataanissaanut piumasaqaat, tamatigut naammassineqarsimassaaq, tassami aningaasaliinerup atorunnaarsinneqarnissaa pillugu naalakkiuteqarneq, Kalaallit Nunaata isumannaatsuunissaannut imaluunniit tamat toqqissisimatinneqarnissaannut eqqarsaatigisassat aallaavigalugit pisussaammat.

Inatsisip tunngaviusup namminersortut kisiisa illersunngilai, kisianni aamma inatsisitigut pisinnaatitaasut pisussaatitaasullu, inunnit pilersinneqarsimasut (imaluunniit tiguneqarsimasut) suussusaat tamaasa – ingerlatseqatigiiffiit, peqatigiiffiit, suliffeqarfiit imminnut ingerlatittut il.il. Aamma pisortanit naalagaaffiup, kommunit aamma inatsisitigut pisinnaatitaasut pisussaatitaasullu pilersitaat (imaluunniit tamakkiisumik tigusimasaat) pisarneq malillugu illersugaasut, pisarneq

malillugu isumaqartoqarpoq. Pisuni tamani pisortani inatsisitigut pisinnaatitaasut pisussaataasullu namminersortutulli tamanit illersugaanerup assinga pineq ajoraat, taamaattoq sulisaatsimi nutaanerusumi takuneqarsinnaavoq.

Oqaaseq “pigisaq” inatsimmi tunngaviusumi § 73-imi oqaaserineqartoq, atituumik paasineqassaaq. Taamaalilluni pisarneq malillugu piginnittuusinnaaneq taamaallaat aalajangersakkap illersunnigikkaa, nalinginnaasumik isumaqarfigineqarpoq. Aamma atorsinnaasanut pisinnaatitaaffiit killillit, soorlu atuisinnaatitaanerit, pigisaq pillugu naalakkiutit imaluunniit pisinnaatitaaffiit eqqartuussivikkut nalunaarsukkat aamma qularnaveeqqusiussaarluni taarsigassarsiani pisinnaatitaaffiit, aamma namminerisamik isumaqatigiissutit malillugit pisinnaatitaaffiit inatsimmit tunngaviusumit pigisaq pillugu oqaatsip imarisaani illersorneqarput.

Aalajangersakkap taamaallaat innuttaasut akornanni inatsiseqartitsinertut pissuseqanngitsut, kisianni aamma pisinnaatitaaffiit immikkut ittut inuussutissarsiornermut tunngassuteqartut pisortat inatsiseqartinneqarnerat tunngavigalugu pilersinneqartut, assersuutigalugu namminersorluni inuussutissarsiorsinnaatitaanerit illersorneqartut, aammattaaq nalinginnaasumik isumaqarfigineqarput.

Inatsimmit tunngaviusumit isigalugu pinngitsaaliisummik taarsiissutitalimmik pigisanik piginnikkunnarsitsineq pineqassappat, akuliunneq pinngitsaaliisummik taarsiissutitalimmik pigisanik piginnikkunnaartitsinerup suliarineqarnera pineqassaaq (tunniussineq pineqassaaq).

Inatsit tunngaviusoq pillugu inatsiseqartitsineq pillugu atuakkiaatini aamma sulisaatsimi, inatsisiliornissamut pissaaneqartut – pinngitsaaliisummik taarsiissutitalimmik pigisanik piginnikkunnaarsitsinertaqanngitsumik – inatsimmi tunngaviusumi § 73-imi pisinnaatitaaffiit illersugaasut pillugit pisinnaatitaaffiit atorneqarnerat malittarisassiorsinnaagaat, ilaatigut innuttaasut qanoq iliornissamut kiffaanngissuseqarneranni aamma nammeneq pigisaminnik atuisinnaanerannut killiliinikkut, tassunga atatillugu nalinginnaasumik isumaqartoqarpoq. Akuliunneq pinngitsaaliisummik taarsiissutitalimmik pigisanik piginnikkunnaarsitsinertut pissuseqarnerasoq pillugu apequt, akuliunnerup qanoq issusaa pillugu ataatsimut nalilersuinerimik tunngaveqassasoq, aammattaaq isumaqarfigineqarpoq.

Pinngitsaaliisummik taarsiissutitalimmik pigisanik piginnikkunnaarsitsinissap suliarinissaanut periarfissaliissut atituumik samminiffeqarpoq, taannalu pinngitsaaliisummik taarsiissutitalimmik pigisanik piginnikkunnaarsitsinerup inatsit malillugu iliuusissat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerit

pitsaaliorniarlugit pisariaqartinneqartut naammassinissaanut pisariaqartinneqartunut
killiliiffigineqarpoq.

Siunnersuummi § 11 malillugu akuliunnerit taamaammat Kalaallit Nunaata isumannaatsuunissaata imaluunniit tamat toqqissisimatinneqarnissaata illersorneqarnissaannik tamatigut siunertaqassapput. Ingammik pissutsit, nunamit allamit aningaasaliinerup atorunnaarsinneqarnissaa pillugu naalakkiuteqarnermik kinguneqartut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerit eqqarsaatigineqarnerannik tunngaveqartinneqarnerata pinngitsaaliisummik taarsiissutitalimmik pigisanik piginnikkunnaarsitsinerup pineqarnissaanut ilaatigut pingaartitsinerimik oqariartuuteqarnera isumaqarfigineqassaaq. Kisianni pissutsit assigiinngitsut pissutigalugit akuliunnerup pinngitsaaliisummik taarsiissutitalimmik pigisanik piginnikkunnaarsitsinertut isigineqarsinnaanera akerlilernerqarsinnaanngilaq. Tamanna suliameer ataasiakkaami pissutsit piviusumik nalilernerqarnerannik tunngaveqassaaq.

Imm. 2-mut

Inatsit manna malillugu iliuutsit naammassineqarnissaat pinngitsaaliisummik taarsiissutitalimmik pigisanik piginnikkunnaarsitsinertut akuliunnertut suliarineqarpata, piginnittumut tassunga imaluunniit piginnittunut taakkununga tamakkiisumik taarsiissuteqartoqarnissaa, *imm. 2-mi* siunnersuutigineqarpoq.

Pisuni Inatsisartut inatsisaat malillugu, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsinerit pitsaaliorniarlugit iliuuseq pisariaqartinneqartoq, pinngitsaaliisummik taarsiissutitalimmik pigisanik piginnikkunnaarsitsinertut isigisariaqartoq, aningaasaliisumut nunamit allameersumut tamakkiisumik taarsiissuteqarnikkut taamaallaat iliuutsip naammassineqarsinnaanissaa, aalajangersagassatut siunnersuutigineqartup malitsigaa.

Imm. 3-mut

Imm. 1 malillugu pinngitsaaliisummik taarsiissutitalimmik pigisanik piginnikkunnaarsitsinermi sulisaasissaaq pillugu malittarisassanik erseqqinnerusunik Naalakkersuisut aalajangersaasinnaasut, *imm. 3-mi* siunnersuutigineqarpoq.

Aalajangersagassatut siunnersuutigineqartoq malillugu assersuutigalugu immikkut ittumik isumalioqatigiissitat, *imm. 1* malillugu sulianik suliarinnittussat, pilersinneqarsinnaassapput, matumani isumalioqatigiissitat qanoq ilillutik pilersinneqarnissaa pillugu malittarisassat, aamma malittarisassat suut isumalioqatigiissitani suliat suliarineqarneranni atuutissanersut ilanngullugit.

§ 17-imut

Imm. 1-imut

Akuersissuteqarnissamik qinnuteqaatit, nalunaarutiginninnerit, piunasaqaatit pillugit neriorsuinerit, nalunaarusiat il.il., Naalakkersuisunut nassiunneqartut, kalaallisut imaluunniit tuluttut oqaasertaliorneqassasut, imm. 1-imi siunnersuutigineqarpoq, taamaattoq imm. 2 takuuk.

Naalakkersuisut aningaasaliisartullu nunamit allameersup imaluunniit akuusup attuumassuteqartup, assersuutigalugu kukkunersuisup, akornanni attaveqatigiinneq kalaallisut imaluunniit tuluttut pissasoq, aalajangersagassatut siunnersuutigineqartup kinguneraa. Uani pisortat ingerlatsineranni suliasat suliarineqartarnerat pillugu inatsimmi § 7 a-p avaqqunneqarnera pineqarpoq.

Imm. 2-mut

Qinnuteqaatit il.il. tuluttut nassiunneqarpata, aamma kalaallisut nutserisoqarnissaa pisariaqartinneqartoq, Naalakkersuisut nalilerpatigit, tassunga aningaasartuutit aningaasaliisartup nunami allameersup akilissagai, imm. 2-mi siunnersuutigineqarpoq.

Qinnuteqaatit il.il. tamarmik, tuluttut nassiunneqartut, kalaallisut imaluunniit qallunaatut nutserneqartariaqarnerat, aalajangersagassatut siunnersuutigineqartup kingunerinngilaa. Taamaallaat pisuni ataasiakkaani taamaaliortoqarnissaata pisariaqartinneqarneranik, Naalakkersuisut piviusumik naliliineranni tamanna pissaaq.

§ 18-imut

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni allagaatinik takunnissinnaatitaaneq aamma inuup imminut tunngasumik paasissutissat pillugit takunnissinnaatitaanera pillugit malittarisassat, sulianut Inatsisartut inatsisaat manna imaluunniit tassannga malittarisassat malillugit suliarineqartunut atuutinngitsut, § 18-imi siunnersuutigineqarpoq.

Pisortat ingerlatsinerat pillugu paasitinneqarsinnaatitaaneq pillugu inatsit malillugu allagaatinik takunnissinnaatitaaneq, sulianut misissuinernullu Inatsisartut inatsisaanni matumani ilaatinneqartunut atuutinngitsaq, allagaatinik takunnissinnaatitaanermut ilaatitsinnginnissap siunnersuutigineqartup kinguneraa. Pisortat ingerlatsinerat pillugu paasitinneqarsinnaatitaaneq pillugu inatsimmi oqaaseqaatit allattorneqarnissaannik pisussaaffik pillugu § 6 kisianni sulianut inatsit manna malillugu suliarineqartunut atuutissaaq.

§ 19-imut

Imm. 1-imut

Nunamit allamit aningaasaliineq, § 8 malillugu imaluunniit § 11 malillugu naalakkiuteqarnermut itigartitsissuteqarnermut imaluunniit inerteqquteqarnermut akерliusumik isumaqatigiissutigineqartoq imaluunniit attanneqartoq, akuusut akornanni atuuttuussuseqassanngitsoq, imm. 1-imi siunnersuutigineqarpoq.

Aningaasaliisut nunanit allaneersut aamma taakku isumaqatigiissuteqarfigisaat, isumaqatigiissut § 8 malillugu itigartitsissutigineqartumut imaluunniit inerteqqutigineqartumut akерliusoq tatigisinnaanngikkaat, aalajangersakkap kinguneraa.

Aningaasaliisut nunanit allaneersut aamma taakku isumaqatigiissuteqarfigisaasa isumaqatigiissut nunamit allamit aningaasaliinerup atorunnaarsinneqarnissaa pillugu § 11 malillugu itigartitsissutigineqartumut imaluunniit inerteqqutigineqartumut akерliusoq tatigisinnaanngikkaat, aalajangersakkap kinguneraa. Tassani akuusut peqqusersuitsumik imaluunniit piaaralutik iliuuseqarsimanerat apeqqutaanngilaq.

Isumaqatigiissutip atortussaannngitsup inatsisitigut sunniutaasa atortussaannngitsunngortitsineq pillugu malittarisassat nalinginnaasut malissavai, matumani akuusut akornanni akiliutit utertinneqarnissaat ilanngullugit.

Imm. 2-mut

§ 8 malillugu itigartitsineq imaluunniit § 11 malillugu atorunnaarsitsinissamik naalakkiuteqarneq malinneqanngippat, akuersissut Kalaallit Nunaanni oqartussanit atulersinneqartoq, suliniummut nunamit allamit aningaasaliinermut tunngassuteqartoq, Naalakkersuisut atorunnaarsissinnaassagaat, imm. 2-mi siunnersuutigineqarpoq.

Kalaallit Nunaata isumannaatsuutinissaanut imaluunniit tamat toqqissisimatinneqarnissaannut eqqarsaatigisassat pissutigalugit, malititsinnginnerup iliuusereriikkanut Naalakkersuisut kinguneqartitsisinnaanerat, aalajangersakkap periarfissippaa. Kalaallit Nunaanni oqartussaasunit tamanit akuersissutit utertinneqarnissaannik aalajangersakkakkut Naalakkersuisut periarfissaqalerput. Taamaalilluni namminersorlutik oqartussani oqartussaasuni kommuninilu oqartussaasut tassani ilaatinneqarput.

Akuerissutitut tamanut, suliniutitut, nunamit allamit aningaasaliinermut tunngassuteqartumut, atulersinneqartunut, aalajangersagassatut siunnersuut atuutissaaq. Aningaasaliisumut nunamit

allameersumut, Kalaallit Nunaanni immikkoortortaarfimmut imaluunniit akuusunut attuumassuteqartunut allanut akuersissutit atulersinneqartut Naalakkersuisut utertissinnaagaat, tamatuma kinguneraa.

Atsikkutigiissitsinissamik tunngavik isiginiarlugu aalajangersagassatut siunnersuutigineqartoq atorineqassaaq.

§ 20-imut

§ 11 malillugu nunamit allamit aningaasaliinerup atorunnaarsinneqarnissaa pillugu naalakkiut malinneqanngippat, suliffeqarfimmi Kalaallit Nunaanni najugaqartumi, aamma aningaasaliisartup nunanit allaneersup pineqartup naalakkersugaani, piginnittutut piginneqataassutip taasisinnaatitaanermut attuumassuteqartup atorunnaarsinneqarnissaa, Danmarkimi Erhvervsstyrelsimut Naalakkersuisut innersuussutigisinnaagaat, § 20-imi siunnersuutigineqarpoq. Naalakkersuisut noqqaassuteqarnerisa kingorna Erhvervsstyrelsip taasisinnaatitaanerup atorunnaarsinneqarnissaanut periarfissaq taamaallaat atorsinnaagaa, naatsorsuutigineqarpoq. Taamaalilluni Inatsisartut inatsisaat malillugu Erhvervsstyrelsi nammineeirluni pisinnaatitaanngilaq.

§ 11 malillugu atorunnaarsitsinissamut piffissaliussaq naasimappat, aningaasaliisartuq nunamit allameersoq pineqartoq Naalakkersuisut siullermik malitseqqullugu nukingisaassavaat aamma nunamit allamit aningaasaliineq suli atorunnaarsinneqanngippat, suliffeqarfimmi Kalaallit Nunaanni najugaqartumi, aamma aningaasaliisartup nunanit allaneersup pineqartup naalakkersugaani, piginnittutut piginneqataassutip taasisinnaatitaanermut attuumassuteqartup atorunnaarsinneqarnissaa pillugu Danmarkimi Erhvervsstyrelsi aalajangiissasoq, Erhvervsstyrelsimut Naalakkersuisut innersuussinissaat ilisimatitsissutigissavaat.

Aningaasaliisartup nunamit allameersup kingusinnerusukkut taasisinnaatitaaneq pisaareqqinnaviannngilaa, tassami aningaasaliisartup taasisinnaatitaanermik arsaarneqarnera pillugu aalajangiineq, aningaasaliisartup suliffeqarfimmi piginnittutut piginneqataassutit pigisaqarnera, Kalaallit Nunaata isumannaatsuunissaanut aamma tamat toqqissisimatinneqarnissaannut navianartorsiortitsisinnaaneramik tunngaveqarmat.

Aningaasaliisartuq nunamit allameersoq, nunamit allamit aningaasaliinerup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisup atorunnaarsinneqarnissaanik naalakkiuummut malinninnginnermigut, inatsisinut akerliusumik iliuuseqarsimammat, pisuni taamaattuni pinngitsaaliissummik taarsiissutitalimmik pigisanik piginnikkunnaarsitsinissamut piumasaqaatit nalinginnaasumik naammassineqarnaviannngillat.

Kisianni suliat takkutissappata, taakkunani piumasaqaatit qaqutigorluinnaq naammassineqarsimallutik, § 16 malillugu pinngitsaaliissummik taarsiissutitalimmik pigisanik piginnikkunnaarsitsineq pisinnaassaaq.

§ 21-imut

Imm. 1-imut

Inatsisartut inatsisaat ulloq 1. januar 2026 atuutilissasoq, imm. 1-imi siunnersuutigineqarpoq.

Imm. 2-mut

Nunanit allanit aningaasaliinermut, inatsisip atuutilinnginnerani naammassineqarsimasunut, Inatsisartut inatsisaat atuutissanngitsoq, imm. 2-mi siunnersuutigineqarpoq.

Nunamit allamit aningaasaliineq qaqugukkut naammassineqarsimasutut isigineqarsinnaanersoq pillugu, aningaasaliinerup suussutaa apeqqutaavoq.

Kalaallit Nunaanni suliffeqarfimmi piginnittutut piginneqataassutit pissarsiarineqarnerat pineqarpat, piginnittuunermi pissutsit Erhvervsstyrelsimut nalunaarutigineqarneranut tassaassaaq piffissaq aallaaviatigut pingaaruteqartinneqartoq.

Isumaqatigiissummit tunngaveqartumik naalakkersuisinnaaneq imaluunniit sunniuteqarsinnaaneq pineqarpat, isumaqatigiissutip pineqartup isumaqatigiissutigineqarnera imaluunniit suliniutip aallartinneqarnera tassaassaaq piffissaq aallaaviatigut pingaaruteqartinneqartoq.

Nunamit allamit aningaasaliineq pioreersoq, Inatsisartut inatsisaata atuutilersinneqarnerata kingorna § 3, nr. 4, litra b-mut siunnersuummi killiliussat aalajangerneqarsimasut qaangerlugit annertusineqarpat, nunamit allamit aalajangiinerup annertusineqarnera tassaassaaq, Inatsisartut inatsisaannit atuiffiusussaaq. Taamaattoq Inatsisartut inatsisaata atuutilinnginnerani aningaasaliinermut naammassineqarsimasunut akuliuttoqarsinnaassanngilaq.